

靖安縣志卷之十

人物志

上

豫章自漢迄唐凡歷千餘年人才之見於史策者代不
過數人至宋而名儒顧輔彪炳東南乃始洩彭蠡匡廬
之靈秀是河生才之難也夫全才罕觀法上得中善善
從長觀物宜恕有如臧孫氏之所論三不朽者尙矣卽
僅一節有可風亦已廉頑而立懦官無論大小立忠者
貴人無論窮達砥行者傳降及巾幗之貞媛凡以輔翊
夫聲教靖雖小邑亦人才者鏡之資也

名臣

宋

范瑄字次房紹聖進士大觀中獻時政利害八事令南漳上言監司州縣措克誅求徽宗覽章示執政曰范瑄小臣忠於報國非瑄朕不聞此言且令召瑄察其才欲待以不次執政不可遂自乞知鬱州復奏嶺南漕臣徐惕僞作御筆處分收買珍禽異獸犀玉珠貝瑋瑁翠羽孔雀玩好詭異等物以萬數騷動兩路民不聊生封章再上乃罷惕前後奏事剴切深中時弊官終左朝散大夫

通志

案范次房邑之熊仙都官莊人建有專祠舊志傳末載明知縣張伯祥祭文今改入藝文志

幸元龍慶元進士初尉京邑居官慷慨有風節時万俟卨之孫與岳飛家爭田歲久不能決理宗御批金牌勅賜諸侯劔皂纛旗袞龍筆架玳瑁硯特命元龍裁斷案積如山元龍並不閱視卽判以大義云靖康之變臣子所不忍言東南全半壁之天者岳武穆之功也中原絕可圖之望者万俟卨之罪也武穆乃一代効忠名將秦檜實萬世賣國賊臣凡檜所以殺忠臣懷逆謀者皆卨助成其惡雖籍其家不足以謝天下尙敢與岳氏爭田乎可謂不揣其本矣田歸於岳舉火悉焚其案上得奏大喜復賜緋魚袋一象笏一玉帶一金帛百端梅花金臺箋一副以旌之蓋異數也

累擢郢州判卒謚清節

舊志

明

李叔正字克正初名宗頤年十二能詩長益淹博時江西有十才子叔正其一也以薦授國子學正洪武初告歸未幾復以薦爲學正遷渭南丞同州蒲城人爭地界累年不決行省以委叔正單騎至剖數語立決渭南歲輸糧三萬豪右與猾吏爲奸田無定額叔正履畝丈量立法精密諸弊盡剔遷興化知縣尋召爲禮部員外郎以年老乞歸不許改國子助教於是叔正三至太學矣帝方銳意文治於國學人材尤加意然諸生多貴胄不率教叔正嚴立規條且

夕端坐督課無倦色朝論賢之擢監察御史奉命巡嶺表瓊州府吏訐其守踞公座簽表文叔正鞠之守得自抵吏罪太祖嘉之曰人言老御史懦乃明斷如是耶累官禮部侍郎十四年進尙書卒於官叔正妻夏氏陳友諒陷南昌時投井死叔正感其義終身不復娶

明史

祀鄉賢

案舊志本傳俱采蘇伯衡墓誌茲已補墓誌於藝文故卽用明史列傳詳畧互見以省繁複

况鍾字伯律初以吏事尙書呂震奇其才薦授儀制司主事遷郎中宣德五年帝以郡守多不稱職會蘇州等九府缺守皆雄劇地命部院臣舉其屬之廉能者補之鍾用尙書

蹇義胡濙等薦擢知蘇州賜敕以遣之蘇州賦役繁重豪猾舞文爲奸利最號難治鍾乘傳至初視事羣吏環立請判牒鍾佯不省左右顧問惟吏所欲行止吏大喜謂太守閻易欺越三日召詰之曰前某事宜行若止我某事宜止若強我行若輩舞文久罪當死立捶殺數人盡斥屬僚之貪虐庸懦者一府大震皆奉法鍾乃蠲煩苛立條教事不便民者立上書言之清軍御史李立勾軍暴同知張徽承風指動以酷刑抑配平人鍾疏免百六十人役止終本身者千二百四十人屬縣逋賦四年凡七百六十餘萬石鍾請量折以鈔爲部議所格然自是頗蠲減又言近奉詔募

人佃官民荒田官田準民田起科無人種者除賦額崑山諸縣民以死徙從軍除籍者凡三萬三千四百餘戶所遺官田二千九百八十餘頃應減稅十四萬九千餘石其他官田沒海者賦額猶存宜皆如詔書從事臣所領七縣秋糧二百七十七萬九千石有奇其中民糧止十五萬三千餘石而官糧乃至二百六十二萬五千餘石有畝徵至三石者輕重不均如此洪永間令出馬役於北方諸驛前後四百餘匹期三歲遣還今已三十餘歲矣馬死則補未有休時工部征三梭濶布八百匹浙江十一府止百匹而蘇州乃至七百乞敕所司處置帝悉報許當是時屢詔減蘇

松重賦鍾與巡撫周忱悉心計畫奏免七十餘萬石凡忱所行善政鍾皆協力成之所積濟農倉粟歲數十萬石賑荒之外以代民間雜辦及逋租其爲政纖悉周密嘗置二簿識民善惡以行勸懲又置通關勘合簿防出納奸僞置綱運簿防運夫侵盜置館夫簿防非理需求興利除害不遺餘力鋤豪強植良善民奉之若神先是中使織造採辦及購花木禽鳥者踵至郡佐以下動遭管縛而衛所將卒凌虐小民鍾在斂跡不敢肆雖上官及他省吏過其地者咸心憚之鍾雖起刀筆然重學校禮文儒單門寒士多見振贍有鄒亮者獻詩於鍾鍾欲薦之或爲匿名書毀亮鍾

曰是欲我速成亮名耳立奏之朝召授吏刑二部司務遷御史初鍾爲吏時吳江平思忠亦以吏起家爲吏部司務遇鍾有恩至是鍾數延見執禮甚恭且令二子給侍曰非無僕隸欲藉是報公耳思忠家素貧未嘗緣故誼有所干人兩賢之鍾嘗丁母憂郡民詣闕乞留詔起復正統六年秩滿當遷部民二萬餘人走訴巡按御史張文昌乞再任詔進正三品俸仍視府事明年十二月卒於官吏民聚哭爲立祠鍾剛正廉潔孜孜愛民前後守蘇者莫能及鍾之後李從智朱勝相繼知蘇州咸奉敕從事然敕書委寄不如鍾矣

明史

祀鄉賢

案舊志亦采史傳中間有增入茲專用原文有未詳者
見藝文張洪所作生傳中

儒林

宋

胡敦實字觀光紹興進士簽漢陽幕職辰倅何兌以獻言獲
罪時秦檜方興羅織獄當路承之以自媒敦實被命力辭
不受劾褫一級盧溪王庭珪慰之曰緣此受責其勞多矣
後知臨賀軍事奏減上供之半請憲司損折苗之直以寬
民力利及兩路又知全州敦實學問精粹深於左氏班史
詩文皆簡古有玉澗集敷文魯嘗誌其墓稱爲學者儀型

林志
祀鄉賢

胡敦詩字可興敦實之弟紹興八年進士時年二十二先與
海昏劉氏爲姻不數年劉頓貧旣登第劉請離昏敦詩指
曰爲誓廣帥陳橐過南昌欲妻以女敦詩力辭竟尋劉盟
明年除廣州清遠簿橐雅敬之留幕中復舉裴寬劉寧事
相激勉或謂之曰坡仙書劉庭式事引羊叔子爲證且云
功名富貴人也子其是矣敦詩正色曰東坡書事特厲薄
俗耳夫婦三綱之首吾儒安計富貴乎聞者益賢之官終
左朝散郎

林志
祀鄉賢

舒邦佐字輔國更字平叔少卽以文學知名聞張南軒倡道

嘗從之遊舉淳熙八年進士爲蒲圻主簿改善化長沙輸送苗米三十萬斛郡委邦佐領其事每歲輸納例有所餽邦佐舉而寄諸帑遷衡州司錄參軍茶陵民訴胥吏受賕逮鞠則曰嘗許而未與守倅將罪訴者邦佐言吏蠹易滋民寃難伸於是訴者得從寬減諸所平反多類是時朱子爲潭帥雅重邦佐邦佐亦尊事之啟問不絕皆粹然儒者之言會疾乞歸二女一孫皆刲股以進朱子偉其家孝行欲聞於朝予以祠祿邦佐辭朱子賢而從之家居建立義莊有德於鄉里嘉定中授通直郎卒交諸體皆長尤工駢儷爲周必大袁樞岳正諸人所推服著有雙峯猥藁九卷

學士李大異銘其墓祀鄉賢

參通志及縣舊志

明舒柏字國用少有志聖賢之學師事王文成領正德丙午鄉

薦授歙縣右訓導以四禮五倫爲教知府鄭玉命主管紫陽書院訓六邑生條規約束以身率先所造門下士稱盛行取赴都陞梧州府同知主梧山書院都御史陶公謂柏抱溫故知新之學有成已成物之心復劄主嶺表書院兩廣人士多從之游從王文成平田州有贊畫功遷南京刑部員外以弟柎子炯俱選藩府儀賓例不當授京職改兩浙鹽運司運同尋知南寧府有亞巒遺稿繫言等書祀鄉

賢 增訂舊志

案舒國用從王陽明學有答論敬畏書見陽明全集三
紫陽書院訓迪有方見歙縣志

仕蹟

宋

呂延年字商老風骨秀整卓犖不羈重和進士紹興間調知
南安縣時李綱爲安撫大使力薦於朝轉江西宣諭司議
事攝瑞州招捕盜賊旬月盡平以功歸同列會宣撫某以
劾罷上章乞與同坐朝論燿之改南安倅有治聲後知新
春縣浩然勇退取東坡詩語以有山名其閣新興令陳寅
爲之賦曰壯而仕能行其學老而歸能全其節知止易退

之風化於當時而表於後世祀鄉賢

舊志

余紹祖字光裔紹興進士受知張南軒初授潭州觀察推官
民盜海商旣獲而窮治不承紹祖募人於江淮間得舊舟
示之盜遂駭服及知廬陵縣歲旱郡督課不少緩紹祖持
告身付吏求去郡守改容謝之秩滿積俸二千緡折券弗
取歸裝書數篋而已尋通判江陵府辟守巴東命下以疾
終邑人舒邦佐挽之曰東南官數任來往只單車祀鄉賢

舊志

簡世傑字伯俊自進賢徙居靖安隆興進士初任靖江府司
理參軍外邑以盜上府凡六七人世傑推詳非是後果獲

真盜時參政范成大爲帥將劾令而賞之世傑力辭且謂
令誤非有他成大益賢之暨鎮蜀辟入幕府汲引蜀士皆
一時翹傑改知蒲圻縣政本豈弟行之以信不設科條民
不忍犯知賀州嶺外官自鬻鹽人以爲病遂一切罷之卒
楊萬里銘其墓謂世傑學問逼古今議論守大體所居不
赫赫所去民見思

豫章書
通志

祀鄉賢

塗幼醇字少安嘉熙進士天性孝友博學多才智任吉州通
判潔已愛民政平訟簡盜賊屏跡會旱荒捐俸賑饑民得
延殘喘及解組歸日以經訓課子弟置義田以給族之貧
者祀鄉賢

舊志

舒椅字奇之邦佐曾孫淳祐進士文行高卓官連州錄事參
軍振興學校勸課農桑政修事舉民蒙其澤子燾任瑞昌
令亦多善政世濟其美人以爲貽謀有自云

舊志

劉起龍字應祥始祖鎬徽人任江西刺史遂家靖安淳祐壬
子登狀元第授翰林院編修寶祐六年陞學士轉湖廣左
參政在任六載決獄詳明民無冤抑

舊志

祀鄉賢

舒樸字槐堂邦佐曾孫景定進士授襄陽府學教授經術素
裕育才有方慕其德而從之遊者不遠千里以老乞歸足
不履城市子弟循循守法度人謂立教有蘇湖之風居家
有石室之範

舊志

元

舒嗣隆邦佐六代孫性英邁器量過人初以廣東帥闖掾從
 帥萬奴征獠將至帥使嗣隆先導有數百人俯伏道左曰
 吾輩良民爲獠所掠聞大軍至願奔歸嗣隆曰弗恐旣而
 帥至命悉斬之嗣隆正色言曰殺良不仁殺降不勇旨令
 收捕違旨縱殺不忠帥不得已許之旬日攻獠不下帥怒
 嗣隆格命欲以失機罪坐嗣隆嗣隆曰請寬數日當自下
 遂單車至獠獠見嗣隆來焚香羅拜大書恩官帥府舒外
 郎壽星願編入戶歸奏績擢吉安路治中祀鄉賢舊志
 案舒嗣隆曾爲建昌路經厯吳文正集有建昌路廟學

明

記多歸美嗣隆通志誤以爲宋人

塗斗鎮原名衡以字行由諸生薦舉永樂三年任常州府經
 厯廉勤有爲克贊郡理擢工部營繕司主事呂梁洪河決
 勅委濬治斗鎮食息不遑秋毫弗擾不踰歲而告成沿河
 數百萬生靈安堵如故感其德建祠以祀增訂舊志

案常州府志名宦塗斗鎮有傳舊志誤作斗真

舒文昱字有常博通經典尤邃於詩治家甚肅平生無戲言
 洪武初以稅家子發跡待用於兵部松江鄧主文滋爲民
 害捕輒逋逃大司馬茹瑋薦文昱可用上諭遣之果獲上

喜甚賜白金命吏部記姓名將大用之未幾文昱乞歸養
永樂初下詔求賢儒臣張緝熙以文昱薦授丹徒令歷任
永春休寧丁內艱服闋復知四川富順縣興學校勸農桑
除弊興利百廢具舉後以子敬貴贈承德郎兵部主事吏
部尚書王直銘其墓富順祀名宦本邑祀鄉賢

舊志

塗鏜字虞華爲御史風力矯健時崇文門屢築屢圯朝議湖
廣麻陽洞軍構築有方歷遣御史檄取不赴罷免尋勅鏜
授兵部職便宜行事至則敷宣德意洞軍感格率衆三千
人詣京營建工成擢工部侍郎入朝特賜細樂導至承天
門已而衛妃覺謀敗露旨下洗戮各官諸臺省謝去者不

下十餘人鏜以身任之其執法敢言獲寵優異如此

舊志

鄧本政性耿介不事詭隨學裕而謙綽有古人風永樂辛卯

領鄉薦授會稽訓導以善誘人爲當路推重陞灌陽教諭

兗州府教授游其門者後多爲良臣

舊志

朱永字叔文素行敦孝友由貢生領應天府鄉薦授刑部主

事尋改禮部累陞刑部侍郎正統間出任山東左參轉山

西右轄奉公守法潔已愛民人多誦之

舊志

舒敬字守中別號益齋文昱子永樂間由進士授刑部浙江

司主事鞠獄明允有能聲宣德九年從尚書魏源勦吉安

叛民夏九旭嚴雅等奏功勅賜白金改兵部車駕司屢承

旨閱宣府邊防區處甚當正統丁卯用大學士陳循薦知
嘉興府周悉吏民情偽發摘無遺尤加意教化繕修郡縣
學釐正樂器課諸生以道義時與肄習四禮一時文物稱
極盛焉會處州盜葉宗劉倡亂同尚書石璞平之捷聞賜
衣一襲景泰二年入覲賜勅命尋坐忤鎮守太監免歸祀
鄉賢 增訂舊志

案舊志魏源誤作魏元照明史更正

余泰字安重號兩交東江人積學勤苦工舉子業宣德乙卯
領鄉薦正且先得夢兆人傳爲佳話任南雄府學訓導陞
浦江縣教諭所至士風丕變爲人局度端凝言動有則樂

道人善不矜己長猶有先輩風範 訂舊志

塗淮字達夫號實齋景泰進士授工部主事管理遵化鐵課
賞罰明信人樂趨事成化癸巳出知順慶府邱瓊山作詩
以送之時民苦水患奏請築隄捍水以奠其居與利除弊
弭盜安民閱七載家給人足郡稱大治致仕絕口不談勢
利恭遜待人未嘗以貧富異視僉以長者多之祀鄉賢 舊志

汪璋字伯琪號止庵由貢生授雲南府推官蒞政仁明民以
不冤秩滿陞辰州府通判職董倉儲大旱儲無所出請蠲
免得允百姓戴之乞休歸絕跡城市弟瑞瓊貧窘分產予

之鄉黨服其行誼一日沐浴具服端坐正寢集長幼於前
曰吾逝矣時年八十餘

舊志

舒琥字良玉由郡庠入監授海寧縣丞以廉能稱人惜其位
不滿德民誦之曰撫民一似教兒孩理訟渾如照鏡臺留
住青天作民主丹書忽到海寧來吏部尚書東魯鄒幹贈
以詩

舊志

舒忠字克誠號恕齋由貢生中應天鄉試任肇慶府推官讞
獄明允宏治己酉獠獠構亂流毒郡民忠統丁壯縛賊首
黃亞聰等四十餘名以獻巡撫嘉其績入奏擢京畿道御
史赴京卒於道部民哀感絡繹奔弔江西巡按李循義忠

昔所拔士爲忠立造士坊祀鄉賢

詞舊志

余敦善字天民號覺軒東江人成化歲貢授岑溪知縣縣獠
獠雜處賦役繁重敦善親與民計量籌度未期年而輸將
恐後又教之樽節愛養民藉以饒

府志

甘雨字時霖號靜軒東江人由歲貢中應天鄉試授慈谿知
縣忠恕廉潔士民交稱未一年致政歸耆老葉棐等攀轅
懇留有久旱逢甘雨白日觀青天之謠家居訓飭子弟必
以孝弟廉恥爲先御史顧英銘其墓

詞舊志

舒嘉字至善坊都人宏治歲貢任北京儀勇衛經歷居官勤
慎訓練有方委催運糧船不鞭撲軍弁而運不滯以勞瘁

卒於官人皆惜之

舊志

劉子武字能臣追里人宏治壬戌貢生赴禮部試受知於邱瓊山尚書稱其經術湛深才可致用授茶陵州州判佐郡有聲以老乞休歸當道惜之

新補

舒清字明潔號芸臆坊都人由歲貢授應山訓導陞四川富順教諭造士有方人才蔚起告老歸田怡情山水二十餘年應山兵部侍郎傅鳳翔給事謝廷采皆門下士時造廬問訊卒後皆來會葬知其教澤入人深矣

訂舊志

徐湧字朝宗號卓峯坊都人由貢生任山東齊東知縣清丈田畝爲百姓均糧人感其德著有理學正說政績條約

府志

項璧字文光號草湖經歷鶚之子事繼母以孝聞充選貢授常德府推官遇歲饑捐俸賑濟全活甚衆陞岳州運糧通判治獄無冤催科不擾軍民誓服視篆武陵桃源華容沅州募兵平江收稅武昌皆著廉幹聲院司下檄獎之卒於官

訂舊志

趙炳字文奎號實齋熊仙人事親孝內外無間言鄉鄰貧不舉火者調以粟不能葬者資以槨由貢生授貴州前衛經歷時麻陽寇發黔楚會師合勦檄炳經理糧餉轉運輜重未嘗匱乏兩省都御史俱嘉獎之尋致仕歸里恬退不履

公門

訂舊志

趙文同號晴溪熊仙人嘉靖進士初授上杭合舊例日供文綺罷之邑大饑捐俸購粟以賑擢南京兵部車駕司郎中革除陋規江右糧艘過秣陵停泊無定所風濤爲患文同鑿套以棲之王侍郎靳給軍需衆軍鼓噪單騎爲之解圍出守武昌豪民爭田輒互相鬪殺因亟正其疆界爭端遂息時奉新靖安人有流寓湖廣者與其土人訟魚課文同按理判決初無徇庇人服其公陞貴州兵備道苗酋內訌設方畧禽之止殲其魁苗民感服肖像以祀之陞河南按察司未數月而卒祀鄉賢

訂舊志

陳文號豫西益田人以書經領嘉靖辛酉鄉薦初任黃梅教

諭奉檄校試豫闈所拔俱夙彥尋陞昌邑崇明知縣擢任上元京邑所至以興學爲首務於黃梅建濯足亭於昌邑建復初書院於崇明建尊經閣於上元建井亭庵以時集諸士講明正學取大人不失赤子之心證王文成良知之說當途俱以儒者目之旋乞養歸鄉民某誤罹罪官籍其田百餘畝充公以值售於文文陰還之本主而不取償焉子孫多登仕籍能世其家有政績紀畧同贈篇等集吉水劉太史應秋銘其墓

增訂舊志

應銳字汝恒別字純吾廬都人嘉靖選貢與知縣趙公輔纂修邑乘司鐸桐城卻貧士贊儀清操自矢轉陽春州學正

卓薦擢河源知縣催科不擾爲民興利一時以廉吏稱之
宦績詳河源縣志 訂舊志

吳廷光字維賢號澄源隆慶選貢授鄖縣知縣歲浔饑捐俸
賑濟修建陂堰會疫作捐資瘞埋五百餘口改補南直定
遠縣建臨淮水次倉歲省民脚米三千餘石修學宮貧儒
不能婚者助其完配教民置水車灌田三千餘頃民呼爲
吳公車兩邑俱立祠祀之行取擢大理寺評事以平獄得
情轉本寺寺副卒於官祀鄉賢 舊志

漆時霖字伯若號暘吾萬厯拔貢任泗州同知潔已愛民刑
清政簡一時口碑載道耆年解組州民攀轅留者相屬於

道歸田後德望愈粹與賓筵九次爲士大夫觀法 舊志

舒本立字道生號廬呼坊都人萬厯舉人任紹興通判職兼
水利鹽法區畫皆當上官重其才再督漕運六攝大邑所
至作興士類來宗道余斯行等皆其所賞拔轉雲南維摩
州知州著有友鶴軒詩文集董其昌爲立傳來宗道銘其
墓碣 舊志

陳應慶字西餘文之第三子少與吉水李忠肅邦華同硯席
者十餘年稱石交由胄監選授丹陽丞攝縣事吏不爲奸
羣盜屏跡修兩關橋梁興三鄉水利立義塚卹狴犴除妖
民降佛之惑靖倭寇伏竄之虞邑人咸尸祝焉尋擢四川

龍安府經歷以老乞歸鄉居多義舉士夫莫不高之卒年八十三 增訂舊志

陳以誠號繡谷益田人天啟進士授工部虞衡司主事進郎中出守湖州築東西圩以興水利建吳興書院以課士參著尚書葦籥太湖姦民揭竿欲爲亂以誠密捕其渠魁餘置不問士民感之建生祠以祀擢嘉湖道調海南兵備道兼瓊州學政洊陞福建參議振文飭武皆有聲稱治湖有清政紀畧祀鄉賢 增訂舊志

涂鼎鼐字君定別字和元天啟選貢授浙江泰和令催科不擾泰民德之擢嚴州司馬以母憂去職復同知北直承平

府時烽煙告警鼎鼐詰兵給餉精敏有爲督運漕糧一清夙弊攝府篆二年吏畏民懷督撫交章保薦優旨獎勵賜金花綵緞晉秩知府以老致政歸 訂舊志

趙敷政字建中熊仙人由選貢任雲南亦佐縣知縣首倡建學宮置義田以養士邑有巨盜久爲逋逃藪以計禽之民感爲立生祠陞陝西延安府同知 新補

國朝

熊良字遂子一字白常號最眉追里人順治舉人授信豐教諭轉吉安府教授時當戎馬甫定之後學宮多就頽毀良所至俱倡先繕葺嚴立條規以興文教一時聲望卓然陞

錢塘知縣等卒

新補

舒調良字雲章號曲庵坊都人博學強記涉筆成文邑令高克藩重其才延修縣志以明經任樂安司訓課士力振浮靡門下掇科甚眾李中丞考試學博擢優等將登薦劾調良不樂仕進遂乞歸樂安人士爲立千古芳型額於講堂以志去思生平渾穆若無能遇事有胆識慷慨好義猶見先民之風

訂舊志

舒煒字彤若號吳峯廂都人少失怙能自力學年十三爲邑諸生試輒冠其曹伍鄉闈已得復失自處泰然益勵行業以明經授建昌縣學博課士有聲上官賢之命監鹿洞書

院葺廊廡擴學舍風教一新歸田後修譜收族築書室北溪上杜門却掃不與外事當事每造廬而請鄉邦望重四舉賓筵

訂舊志

舒斯辛字庚仲號靜庵石馬人爲諸生卽通習經世務司鐸建昌務培養士氣先是邑令以才情揮霍自喜遇諸生每盛氣凌之辛至不干以私稍枉辱庠士必面折不阿令憚焉由是待士有優禮於其去也相與作詩歌咏之

訂舊志

舒先行字元起富仁人康熙選貢初授彭澤廣文設立科條首端士品並正文風士皆爭自濯磨丁內艱服闋補南豐教諭課士一如在彭澤時及年老致仕兩邑諸生宗仰猶

昔訂舊志

涂玠字雲石號鏡軒忠夏人康熙舉人授林縣知縣下車值歲旱饑民聚眾剽掠玠縛其首戎置於法諸脅從悉置不問發粟賑濟民得安堵邑有刃人之母而誣其子者執以來一弱童子耳玠偵知訴者袖有殷紅色嚴訊之得實立爲昭雪時大吏以嚴峻泄下僚屬皆惴惴懼不免顧待玠獨厚亦玠之誠樸有以感之也雍正甲辰分校河南鄉闈所取皆知名致政歸築縣西隄岸費錢數百緡捐修黃石橋費金五百家居十三年稀至城市日與族黨交歡人奉爲典型

增訂舊志

舒濂字淑周號憨子康熙舉人性豪爽每下筆數千言不竭兄弟互相師友以讀書談文爲樂司鐸上饒時學宮傾圮與邑令倡捐修葺創建文昌閣邁中丞廉其賢會饒有冤獄密檄訪查立爲申雪全活者九人紳士感其德爲立去思碑弟洛亦明經才思豪邁名與之埒有龍岡集

增訂舊志

涂基字鞏垣號柏莊忠夏人少孤力學中康熙辛卯舉人初任南康教諭旋調弋陽學以儒術兼治才卓異保題引見奉

特旨授廣東南海知縣首邑不由簡調蓋異數也基治事明敏五官並用遇疑難獄辭洞若觀火凡省局發審鉅案皆

取決焉粵東饒於財賦風俗豪華沿海復多盜基到縣嚴
保甲謹關防條議民間吉凶諸禮不得逾制各澳漁船編
號朝出晚歸無令停泊海外海埔肅清每歲冬春交設粥
廠賑窮民生全者以數千計邑田廬當低窪受水患處爲
之築隄捍衛旁鑿支流洩其怒民賴以安至今稱曰涂公
隄任滿當陞以憂歸服闋補直隸龍門令亦多惠政年老
致仕家居當事馮渠聘主修縣志雖未觀成而卒初橐賴
其搜輯之力爲多

新增

舒亮衮字龍章號補亭與兄亮裘一乳生同中雍正癸卯舉
人亮衮才學優異至性過人痛兄早逝無志與計偕保撫

兄子成立凡族黨義舉皆力行之乙卯聘分校廣東秋闈
得士知名乾隆乙丑挑發四川補永川知縣初蒞任驗一
縊死屍刑件報畢將斂衮細察生氣未絕急救之得不死
被告亦全永川素稱好訟衮務以德化有弟兄爭產者前
任不能決衮復訊爲引說古義動以至情因自傷兄歿不
覺哭失聲堂下觀者亦泣兩造感悔嗚咽求息謂吾儕小
人不敢復履君子之庭矣遂爲兄弟如初川省游匪號嘯
嚙子暮夜伺劫恒傷人東捕則西竄流入永境滋患衮設
法密偵所在出其不意獲渠魁置之法民害以除大吏廉
其治行調威遠縣視事後一日履勘入山宿古寺夢與兄

聯句云已無蹤跡在人間夢裏翻然化鶴還華表月明歸路冷終南猶記舊游山覺而記之自知詩識旋以辦水災積瘁卒于官喪還兩邑之民哭送塞道衮行已涖官成歸實踐士林月旦俱以爲無愧鄉先生云所著有補亭語錄詩文集藏於家

增訂舊志

涂坤字至元號順齋忠夏人由監生遵例授沙縣丞等以才能調鳳山撫綏有法海防肅清大計卓異歷署長泰平和二邑令潔已愛民振興學校長泰有雙圳陂者宋時邑人陳耆所築資灌溉農田萬餘頃年代久遠姦民私懇爲田遇旱澇無所蓄洩累任莫能清理坤至悉心履勘修復如

舊撫軍晉陵潘公爲之記里民祠祀之上官稱坤才長治劇實爲傑出之員請補順昌令順素稱難治坤嘗攝其篆措理裕如民方幸其重涖已而入都引

見病作卒於途順昌人聞之越境護喪哀思不置仕閩十有一載始終一節有古循吏風

訂舊志

涂堽字如仲號三峯弱冠補弟子員旋食蘊文章行誼爲邑宰馮渠所敬禮幾於言子之於澹臺氏也乾隆己巳出歲貢選授德安訓導在學修廢起墜不遺餘力教人以身示範諄諄以子衿城闕爲戒一時士類胥宗仰焉

舒亮友字季嘉號益齋石馬人遂之子也幼失恃事繼母尤

篤於孝備嘗辛苦敬終不渝及長博學工古文詞乾隆甲子歲貢己巳邑令馮渠聘纂縣志舊志修於康熙間採訪未廣而體例亦多未協亮友悉心考核刪繁補闕志法大備邑人士彬彬然知文物之盛矣嗣選授崇義學訓導在任十三載訓士有方生徒搆訟據理判其是非毅然不少假貧民有歿而無棺者或求之卽捐俸以助其天性樂善然也年八旬致仕歸鄉人儀其德舉爲鄉飲大賓嘗自言生平無寸長日夜所爲幸無不可對人言耳著有益齋文集

涂光範字禹疇號楷亭基之三子由貢生援例授河南滎陽

丞有才識歷署繁劇十餘縣救荒多善政聽訟立爲剖決獄無停滯他邑之不能決者上官悉委之陞蘭陽令蘭邑隄工夙稱險劇溢是者皆竭蹶不能辦光範裹糧親歷簡稽勤惰與工作欸曲如家人隄成堅固民尸祝焉調鹿邑循聲益著因告養歸起假復補福建浦城浦俗最悍生子者戚友饋鐵鑄刀長則資以禦暴光範嚴禁之教以禮讓悍風頓息會水災籌賑濟法上官絡繹於道供應繁苛光範曰當此哀鴻待哺時尚安能計及供張耶一切薄應之其不媚上官以狷民諸類是光範少卽倜儻不羣最爲奉新甘莊恪汝來所契以女妻之吏治多取法焉後致仕歸

督課子弟盛科名遇歲荒嘗出穀以賑鄉里多陰德云
舒閱字能先號簡亭廂都人以歲貢授九江府學司訓閱爲
學主敬深衣道貌跬步必肅生平一介不妄取亦復存心
濟物教諸生循循莫不有規矩時奉新宋進士五仁主正
齋德化陳方伯奉茲猶未通籍館於宋三人者昕夕過從
雅以道義文章相慕悅比之德星聚焉閱乞休歸陳贈詩
云望見衣冠道念生也知風雅有深情他年老健能來訪
我在廬山家處耕方伯以詩雄海內其爲敬服可想闔家
居孝友無間言有仲兄名開者由文庠中武乙科善鍾王
書法行誼亦爲鄉評所許

舒振甲字鼎元號慕庭亮褻子早孤撫於繼母宋氏母賢子
孝族黨交稱叔父哀憐愛尤厚教之學能世其家弱冠聲
雋一黌循例授山東昌邑縣丞廉幹有爲時登萊觀察沈
公廷芳稱知人振甲與濰縣令揚州鄭燮同見優器歷委
辦災賑重務報放核實胥吏不敢冒剋爲奸災黎頌曰白
馬使君來活我矣蓋以所嘗騎白衛識別之也在昌邑凡
七載而賢勞於外者四年尋陞廣西來賓知縣邑苦瘠衝
振甲不取民間一錢而事無弗舉始來人未知學童試至
不能滿學額乃捐修書院延名師講課分別予以考費三
年後遂有舉於鄉者乾隆辛巳柳州大水隨馮撫軍辦災

全活哀鴻無算卓異題陞左州牧丁內艱歸服闋復選廣西賓州有岑土司之子照來應州考厚餽獻振甲峻拒之不予前錄因語幕客曰是純袴子趾高氣揚後必敗踰年庚子秋果以科場舞弊伏法同官多服其先識上林一疑獄數檢不得傷大府專檄委檢謂此案非爾老吏不辦振甲於檢場覺數人面目可異鞠之則上林使來彌縫者也令當獄看檢傷現獄具而卒不自以爲功其居官剛正存心忠厚類如此晚歲致仕歸居鄉恂恂教子孫以恭儉孝友科名盛事屢見年八十卒比之大邱遺範

舒采願字守中號保齋亮衮第五子性剛直樂義善承父志

早歲事舉業知名援例授甘肅渠寧巡檢清苦奉公守禮不屈人以強項目之一武舉素橫鄉民被害訴於廳願遣役狙執以來大肆咆哮乃按法笞之自檢舉焉上官偉其能弗咎而飭武舉無狀寧夏郡守委解秋審犯赴省犯多車少步行者銀鍤躓仆願憐之令解諸刑具載放已輿而自下車徐步與眾囚共勞苦一日過六盤山天陰晝晦颶風大作眾囚迷竄失路若鳥獸散僕役惶恐疾呼願曰無憂囚將自至移時風定則散失各犯先後從山崖別徑來集矣旋以強幹聲調烏魯木齊呼圖壁巡司渠民送至關口哭別是時新疆屯糧例交文倉收放軍餉願謹筭出納

其積年應得儲羨盡以畀營員代補備徵調兵糧虧空都守以下咸拜德焉乾隆中西例准納粟實邊嗣奉行者失實致興大獄願在官日有索都統發監照百紙畀領備賑力稟繳謝後十年監糧冒賑之案發宦甘省者大半鮮獲全而願獨纖塵未染清操先識論者韙之願歸田捐口分租百石爲世父立繼皆見義之大者以長子慶雲任浙江金衢道贈如其官三子夢蘭著述甚富負盛名於時人以爲清德之報

漆裕字昆垂號厚山棠棣人孝廉顯畧之幼子也生而穎異嗜學通經由恩貢授甘肅階州直隸州判值西藏用兵佐州牧辦理差務閭閻無擾牧倚之如右手時屬爲讞獄皆得其平大吏舉其廉幹方登薦牘裕以年老辭歸晚頗耽禪悅力行善事爲多服其化者比之王彥方云

舒謙福字適我號蕙渠坊都人乾隆辛丑進士選授山東文登縣知縣邑近海土瘠民貧前令馭以煩苛邑滋不治謙福至僅科不急市獄無擾民樂其清正慈祥稱曰佛爺不敢欺亦不忍欺也數年後農桑學校以次肇興忽以風濕致疾卒於官祀遺愛祠謙福平生爲人風度極佳喜怒不形於色見義事必力任其難於根本地尤加意焉比卒遺命捐租支祠助祭費族人以其主祀祠中

舒以健字體乾號醇甫石馬人少有至性傷其大母暨母氏
兩世苦節與兄懋德刻苦撐持門戶讀書並有聲稱以健
爲文尤負奇氣下筆千言立就邑名宿皆畏之中乾隆丁
酉舉人大挑二等授建昌府學司訓初抵任見彝倫堂頽
廢倡首修葺日與諸生講學其中成就人才甚熾整飭士
風維持名教皆據理直行不避嫌怨有瀘溪新進生何之
魴被仇家誣控縣欲會詳以健力爭不可覆訊果誣生得
白爲人剛直類如此

趙籥南字伯高號西崑追里人趙爲邑名族籥南性磊落不
羈爲文條理敷暢得春夏之氣爲多乾隆丁酉拔萃貢成

均 廷試報罷考取膳錄効力四庫館期滿敘用銓永豐
學教諭丁艱復補興國學課士不空設科條但循循善誘
一如自訓其子弟與都人士訂文字交某酒風流使人襟
懷自遠

項杰字英起大梓人其先世俱以儒素起家杰自少能讀父
書爲文才思發越累試優等乾隆丁酉舉於鄉以大挑選
授撫州府學司訓丁艱服闋復署新城教諭江右撫建二
郡名賢輩出土子多務實學杰爲教一本王曾經術而倡
復五家法派故所至信從稱盛爲人和易醇謹終身無疾
言遽色其弟鵬由拔貢舉孝廉文品雙清雅好吟咏惜未

享大年今縷數舊家者猶稱二項云 以上新增

文苑

唐

劉昫虛字全乙時吳兢爲淇州刺史方直少許可獨高其行
改所居之里爲孝弟鄉以表異之開元中舉宏辭累官崇
文館校書郎與孟浩然王昌齡相友善評者目昫虛詩情
幽興遠思苦語奇可以傑立江表有集五卷行於世 豫章書
按劉全乙又字挺卿曾爲夏縣令故當時有劉夏縣之
稱舊志云初授左春坊司經局校書郎轉崇文館所著
名鶴鶴集其籍貫考辨別見選舉

明

舒文輝字充甫石馬人以諸生選充弋陽王府儀賓顧性耽
清尚淡然軒冕自築怡雲軒日讀書吟眺其中南昌舒曰
敬時號文章祭酒嘗以通族來遊靖安遇人不輕許可顧
獨數數稱文輝講學倡酬無虛日怡雲集多曰敬所評定
者 新補

舒孟華字去華坊都人本立子承父家學記問淹博詩文並
茂七試鄉闈不遇崇禎初貢成均授青田丞孟華曰此固
郁離子著作之地也郁離不高安丞乎日夕手一編伊唔
不置丞專司鹽兼督糧鹽苦積盜糧苦蠹役暗加孟華設

方畧捕獲渠魁且痛草獍胥之漁獵者士民手額以頌秩
滿遷楚衛參軍卒青邑祀名宦所著有念梅館集二十四
卷舊志

舒春陽字管生孟華長子世以文學傳家春陽天姿超邁志
行過人自少讀有用書崇禎末年土寇掠靖境春陽倡義
募勇佐司李胡時亨勦平之鄉井獲安以軍功入貢未展
其用乃隱居適志構石閣於繡谷峯之頂顏曰姿天聚古
今圖史吟眺其中自謂置身千仞下視塵事如糝糠也所
交徐世溥萬時華宋之盛顏方平輩盡一時名士爲詩文
獨闢奧境不主故常尤善懷素草書斷縑尺幅人爭寶之

著有平寇紀畧步雲閣詩集其弟春和舉乙科並有名於
時詩亦清絕

陳舜全字子野號鏡山丹陽丞應慶仲子少負雋才有磊落
不羈之概崇禎癸酉中副車已卯受知於提學侯峒曾贈
以南州高士額庚辰奉部檄副榜準作貢生咨送成均肄
業與奉新廖芳春等伏闕請試獻籌邊策灑灑千餘言朝
議謂其揣摩情事悉中機宜將擢用之會聞鄉閭寇亂念
父衰邁適歸佐胡司李勦平土賊甲申以後遂高尚不復
出楊機部廷麟劉司成同升招之皆不往惟日以皇極經
世一書自怡而已著有明悅山房詩文集

得一邃字初民富仁人明季諸生時舒春陽提倡風雅一邃
 偕其弟颺玉及陳于野何肇羲鄭延祖鄭小韓諸人從而
 和之邑中文藻特盛其詩風格獨超不僅為流連光景語
 五言佳者直入盛唐之室遭世不諧賣志中逝徐巨源哭
 以三詩極沈痛身後訪其遺藁得菑園集一卷今已梓行
 猶子銑選貢生能傳其學 以上新補

國朝

周二懋字又生順治初恩貢生負文名與臨川陳際泰艾南
 英友善能詩嘗有登姿天閣詩曰鳥隨清磬集石似老僧
 憨之句為人傳誦刻有愚山詩鈔子甸方有文名為名諸

生孫京緒康熙舉人曾孫瑞歲貢生會昌訓導 府志

舒彥字俊升一字碧庵石馬人順治舉人記問淹博善率更
 書法邑中人士多宗法之著有石園文集月舫詩集兄弟
 共爨終其身有張陳之風子六斯佶遂別有傳三子庚亦
 擅文名著自怡草堂集六卷曾孫相繼登貢舉以文學世
 其家 增訂舊志

熊明弼字石庵熊仙人順治舉人行誼端介善事繼母以孝
 友稱庚戌計偕北行同舟談某病甚抵維揚歎恐稽試期
 皆委之去明弼獨留醫治尋愈仍偕馳入都試期不誤人
 服其高誼著有四書衷辨尚書正義孝經曉義尺天齋集

舒其瑄字白子廂都人博學能文髫齡補弟子員旋中副車
康熙戊午鄉試出闈後自決必售榜發果獲雋癸酉纂修
縣志有三長之譽後選鄱陽教諭端士習造育人材一時
蔚起數載乞休歸

府志

涂棻字二張熊仙人康熙舉人性至孝母病危甚醫者謂需
嘗痰味之鹹苦棻竟嘗之醫乃進以所宜藥病果痊與兄
棻才名並著刻有制藝合稿棻次貢而卒當時士林月旦
有上有濂洛下有棻棻之稱

增訂舊志

漆顯畧字漢及號韜庵棠棣人康熙辛卯領鄉薦高等雍正

己酉聘分校江南鄉試主試黎公亟稱之數上公車不第
已需次選縣令堅臥不出以耕樂名其齋比之辛幼安觀

稼軒焉所藏圖書頗富文瀾浩博著有耕樂齋集

新補

熊春陽字仲和號石溪棠棣人少師事漆顯畧稱高足雍正
甲辰中鄉舉清貧好學讀書桃源山中面壁二十年不入
城市嘗袖書送客客別去春陽誤以去路爲歸路徐步微
唵至沙港始返則已十餘里矣其書淫如此著有四書周
易講義與同年友新建劉斯組談易契合組常來山中約
刻時文合稿並欲敘易義梓之及春陽下世組趨弔急索
遺稿家人不知襲藏半已霉爛不可讀組嘆息而去

新補

涂鼎瑞字泗符熊仙人性嗜學不倦家居屢空晏如也郡邑負笈從遊者歲以數十計門下稱盛著有四書摘要書詩

兩經集義

增訂舊志

舒斯信字又閑號香崖彥次子讀書以勤苦勝人每手一編通宵雜誦不徹嘗言爲學欲橫豎貫串須從悟入非因心衡慮無由生悟皆自道其所得時縣尹毛鵬聘掌義塾課士外文翰往來應時便了毛雅推服選授袁州府學司訓不受諸生饋遺在袁三載致仕歸著有芸香集

訂舊志

舒遂字六成號陸舫彥幼子少孤事諸兄如父奉母極孝母紡績每執卷呶唔其旁母嘆曰爾父沒時曾語我以此子

必繼吾志每憶此語不勝酸楚今爾能勤業吾可對先人於地下矣遂泣而識之益刻厲向學名貢成均性剛方人有非義必面加譙讓故多以嚴見憚然獎誘後進又未嘗不和易近人也生平富才調晚於詩律益精嚴文亦臻醇粹境少作存者絕少著有陸舫集選授南康府學司訓尋以年老致仕

舊志

舒慕芬字蘭軒別字石門節婦廖雪松之子也經史皆母所口授與弟慕芳齊名爲郎中丞廷極所激賞由廩貢授南豐教諭雍正五年舉孝廉應詔擢江南奉賢令松江財賦之區慕芬至振興學校勸課農桑捐修塘泮清理鹽法

皆有實政可紀黃唐堂之雋亦稱其爲政慎勤而慈惠廉而不苛非溢美也在任三載乞養歸母壽躋九十而終專建報本祠彙鐫所徵節孝詩人皆多其孝行著有秋興百韻治奉紀畧與弟合刻花萼文集二舒試草

增訂舊志

熊銓字鼎石別字潔堂埴次子自童子時卽篤志向學每靜坐一室經月不出戶限一飯之頃亦置書案旁手搏飯而目注書家人或奪去之銓亦一笑而已雍正丙午以第二人魁壁經三上公車始登第聘入楚闈分校得士皆翹秀未及銓選而卒邑人士惜之爲文得力三蘇汪洋恣肆能自達其所見著有潔堂文稿駢拇枝詩集

增訂舊志

舒亮字松齡東軒其所居之號也與弟亮表孿生雍正癸卯同舉於鄉文章孝友稱豫章二舒焉表神骨清遠夙慧絕倫七歲走馬成詩輒驚其長老性喜靜每獨往雲壑最幽處流連忘返爲學宗周陸二子日手性理一編蕪蘭滿徑焚香宴坐友于倡酬之外從不問家人俗事體癯善病雖呻吟牀第無廢咏歌世傳其綠天紅雨灑輕烟之句又如夙世紫煙道者友半生明月夢中人皆夢中所得是不食人間煙火語也得年僅三十有八病革語其弟表曰吾豈甘以詩人沒耶吾之終以詩鳴命也亦可想見其志矣

東軒詩集二卷曹宗伯秀先師太史家相並爲之序

陳涇字沂山益田人清介絕俗好學深思初治經於積仙洞中茅屋一椽人罕有知之者及爲諸生則制藝已風行於世邑令黃天球見之謂能擷經史之膏腴而去其糟粕會先儒之語錄而獨發真詮此五家的派也雍正壬子舉於鄉乙卯聘充福建同考官再上春官不第乃里居授徒以造就人材爲樂百餘年來邑中談時藝者輒首屈一指著有四書語錄尚書詳節刪補方竹園制藝

涂寧先字致遠居近繡谷峯因以繡峯爲號光範長子少隨父任受學於仁和宋之范博通經史善詩古文詞時江右詩學方昌南昌楊厚南豐趙由儀鉛山蔣士銓武寧汪輟

有四家之目偕寧先結社齊名學使金公德瑛集一時知名士號爲十八子者寧先與焉選其詩入西江風雅爲文力追章羅犀銳無敵乾隆庚辰鄉試中式第三名癸未成進士選巢縣知縣寧先治譜家傳至是已三世爲郎官矣涖任政成事舉大吏交重其才調知桐城桐夙稱繁劇寧先至邑之世家巨族爭慶得賢尹民以大和連獲巨盜戴小史小江山徐高等紀功委署滁州牧乙酉戊子庚寅三科疊司分校所取盡大江南北之秀後以不能脂韋取容乞休歸晉撫譚公尚忠聘主晉陽平定書院纂修平定州志西士經其造就者彬彬極一時之盛著有石門詩鈔艷

雪堂制藝稿爲人春容大雅論者每以清才終風塵吏惜
之同懷弟嚮先乾隆舉人宋先名諸生並能傳家學

舒性字茗原坊都人鄉賢孟華之後也累世承家學一門羣
從紹聞衣德性稱白眉焉博洽通雅嫻於詞賦由廩生充
乾隆乙酉拔貢人皆以館閣期之及廷試報罷復數奇
於秋賦遂杜門著書日以歌咏自娛其詩寄托高遠體格
精嚴出入於韓杜山谷諸家抒寫懷抱有憂憂獨造處最
爲前大令鄒朝陽所敬禮聘主雙溪書院造就後進極一
時之盛年近七十始官弋陽廣文都人士載酒問奇無虛
日未幾老病歸里卒學者深以未竟所用悼惜之著有茗

原詩集數卷待梓行世

舒祖承字蘊章號靜麓忠夏人少讀書酷好南華文筆超超
元箸奄有項宮詹勝境每一制藝出外間爭傳寫焉乾隆
庚寅領鄉薦戊戌會試同號一江南老宿見其文色然驚
卻謂今年榜首當讓子時典試于文襄敏中亦擊節歎賞
已前列矣旋以策問中有違式語抑置不錄然撒棘後見
人未嘗不道舒生也祖承坐是不得志竟抑鬱以終文多
散失僅有存者

舒衷字煥宗號述齋坊都人性從兄弟少孤折節讀書不事
生產爲文攻苦刻勵兩中副車聲稱藉甚乾隆甲辰赴金

立身見示
卷之十一
陵恭應 召試詩賦典雅時與諸名士訪古觴咏有旗亭
畫壁之風嗣登丙午賢書大挑二等補清江廣文臨江本
二劉故里聲名文物遺風未沫衷復振興儒雅多所陶成
年七十引疾歸著有詩集若干卷 以上新增

武畧

明

漆本珍字元伍棠棣人宣德間從征交趾有功授遼東指揮

使 舊志

舒維忠字克臣石馬人入遼東籍崇禎十二年從總兵左良

玉擊降河南賊劉國能於許州以功賜武舉 舊志

國朝

涂尚忠字敬思號恕齋忠夏人少讀書明大義兼習韜畧以
武起家膺乾隆辛酉鄉舉壬戌聯捷成進士選授直隸蔚
州營守備蔚故燕京北鄙邊防尤重忠訓練士卒有方紀
律嚴肅以故三韓獨石間無桴鼓之警暇日雅歌投壺有
古儒將風度在任六載爲閩帥所倚重構疾告歸年五十
四卒於家

舒時可字際昌號靖溪忠夏人狀貌魁偉胆識過人嘗從其
從兄時義學談古今成敗事動中窾要兄奇其有將才勸
令習武補武庠乾隆壬午舉於鄉丙戌成進士授藍翎侍

衛扈

上巡幸天津行圍木蘭數獲優賞特擢四川太平營都司會
金川不靖從富督出征時可奮勇殺賊 奏換頂戴署本
鎮中軍遊擊兼左營護理川北鎮篆務嗣檄勦甘匪著有
軍功由保舉陞湖南撫標右營遊擊致仕歸林下優遊有
輕裘緩帶之度焉

忠義

元

舒慶遠字伯原嗣龍子志趨高古不侶僣傭侍親至京師從
吳草廬先生遊博通經典尤邃於易及歸應試語之曰儒

者之學不止能決科爲利達計而近時學侶滔滔皆是子
當戒之旋領鄉薦高等至正辛巳成進士授贛州學正調
主濂溪書院未赴紅巾寇起攻靖安慶遠迎監縣潮海倡
義拒敵繕兵儲糧召募勇敢爲固守計潮海敗死省府卽
署慶遠攝縣自是每寇至輒偕鄉進士胡斗元塗淵勇士
黃雲與戰却之寇忿甚合圍益急慶遠力匱被執中途脫
歸以憂憤卒有摠閱錄傳後詩皆杜音祀鄉賢 訂舊志

案通志跋云舒慶遠南昌死義傳失載安志始行補傳
乃已西府志又編入武功門似覺位置失宜安志亦遺
從事吳草廬事

胡斗元字元浩至正十年領江西鄉薦第一署鰲溪書院山
長賊至靖安掠斗元鄉里斗元以鄉兵擊敗之入縣治與
潮海共圖戰守及潮海被執賊脅之使降斗元罵不屈乃
以土蕘其腰不死又縛置暗室斗元仆牆以出逃入深山
而死

元史 祀鄉賢

塗淵字漸亨一字文淵幼穎異博學強記多才畧至正鄉舉
壬辰紅巾寇至與舒慶遠胡斗元倡義拒敵會寇大至合
圍忿攻淵挺身冒鋒鏑出請救援逮歸城已破同義者憤
激死民皆亡散淵招徠糾集保全餘民邑人德之有拒寇

紀事詩見藝文

舊志

黃雲坊都人本籍撫州膽畧過人軀幹雄偉兩臂能挽弓百
斤輕捷騰躍渡水如飛元至正間紅巾寇起應舒慶遠胡
斗元募慷慨赴敵每戰賊輒辟易嘗用木牛破陣禽殺賊
數十人奪其鎗馬以歸木牛者雲造以自衛勝於戈矛雲
以此連破賊營惜其製不傳後以歛寡不敵沒於陣

舊志

案元末紅巾之難義勇以黃雲爲首稱同時死者有監
縣潮海縣尹黃紹皆卓卓可傳然海與紹猶曰死於其
職雲則編氓耳慷慨就死不尤難乎舊志未載雲事使
其生平不著與木牛之製不傳惜哉昔韓昌黎見李翰
張巡傳遺許遠及雷萬春事因作傳以補之今於黃雲

諸人亦為撮其大概以垂諸後俾有所考焉原跋
案雲本臨川人臨川志亦載然竟以為其縣事殊誤

明

陳離字文明天順歲貢授嶽池訓導陞湯溪教諭敷教有條
士類翕服既請老歸清貧自守不改其樂宏治間流賊犯
邑人皆奔突竄伏離獨正衣冠從容以大義責之賊愧謝
而去舊志

舒廷英字菊坡耿介剛毅人有非義輒面斥之正德庚午華
林賊突至其家廷英率眾禦之被執賊叱之跪罵曰死賊
我何人而跪爾賊怒繫之里州劫殺之顏色自若舊志

黃廷輝坊都人寧波節推黃鉉之曾孫與姪黃宗祥素驍勇
正德己巳賊犯縣治典史呂操幾戕於賊廷輝奮力救援
殺一賊宗祥亦連斃二賊尋皆為賊所害知縣蕭瑞憫其
毅勇嘉賚之舊志

漆維縉棠棣人正德庚午與其祖隱雲俱被執賊將及其祖
厲聲曰死賊何不殺我而釋我祖遂被殺聞者傷之舊志
漆應昌應時兄弟棠棣人崇禎癸未土寇作亂兄弟奮勇禽
賊俱戰死舊志

國朝

舒以愈字退公坊都人沈心嗜古口喃於言為人若不勝衣

督學侯公峒曾拔冠童子軍期以遠到以愈絕意功名慨然以山林為樂篤志詩文有八愁詩為明季諸文士所傳誦順治戊子鄧寇陷城族人皆避去以愈諭賊以義辭不少遜卒受害舊志列隱逸照府志增訂

趙樂二熊仙人順治戊子鄧寇攻陷縣城蔓延及于鄉樂二統鄉勇數百禦賊於長坪手搏殺賊數十人陷于陣為賊所獲死義甚烈賊歎駭退舊志

附陣亡戰士

梅桂盆田人駐防戰兵余文斌東江人舒瑞坊都人談學定廂都人俱駐防守兵嘉慶元年調赴湖北剿捕教匪隨官

兵禦賊隨州官灘雞籠山俱戰沒於陣奉

恩旨優卹並入祀郡城昭忠祠

舒兆科忠夏人李華上安人俱駐防守兵嘉慶六年調赴湖北剿捕教匪兆科戰沒於興山縣石虎頭華戰沒於房縣上杭村俱奉

恩旨優卹並入祀郡城昭忠祠

孝友

元

朱仁二朱仲和子也性至孝竭力營養不使父母知其勞至正間母劉氏病亟藥餌弗效默禱於天曰苟可活吾母粉

身甘焉遂割股和粥以進母病頓愈有司以聞詔立精孝坊表之

舊志

明

陳伯宣字宏化號鈍齋幼有至性就傅授孝經輒曰不如此非人子矣弱冠爲諸生有聲以父景濟弗逮養廬墓側刻木肖像事之母熊氏臥病侍湯藥不就寢者百餘日逾年病復亟命曰吾沒後無遠葬旣卒伯宣哀毀骨立蔬食苦寢念母未葬夜夢閩山水有老翁從旁指曰山前水水後山此葬地也覺而覓地符夢兆遂以葬廬墓五年寢室忽萱草叢生荆華四時人以爲孝感所致以子恩貴封知縣

有司以聞詔旌其門仍賜伯宣冠帶

舊志

陳恩字天錫號石峯伯宣子也宏治舉人任湖廣崇陽令幼淳篤無童心秉承父教亦以孝聞母舒氏患風症採藥遇異人指藤樹煮酒可療如言疾果瘥逾年復苦痰咳醫令恩驗涎味酸苦恩卽啖以告乃加所宜藥又效後又患熱疾幾篤侍湯藥衣不解帶割股和粥以進亦痊已而母疾竟不起毀瘠失常雖服除猶有餘哀會父左股患毒將危禱以身代越三月又瘥事繼母不異所生宏治間詔旌父子孝行之門子道亦登賢書任知縣

增訂舊志

舒棐字似輔御史忠之子事母廖氏冬溫夏清未嘗少怠出

必稟命得甘旨物必懷歸奉母客至具雞黍必先以進母人初疑其干名及久而無間有欲上其事者棊力止之曰此吾分內事耳以此爲孝適重吾尤母老且病棊亦病猶調湯藥勿倦母泣曰吾兒如此賢孝天必有以報母九十二而卒哀毀骨立越七日亦死鄉人皆爲感泣知縣葉轍作詩以哀之

舊志

徐學文字載道別字養性漢南州高士孺子之裔祖富昌自南州徙居邑之石霞父梓英復徙縣市東門內學文少時識量過人動必以禮士夫競異之每朔望必齋沐籲天祈父母壽居喪哀毀踰禮冬不絮夏不扇食不甘旨衰經不

少除妻蕭氏執婦道內相多方嘗以陶孟訓子爲法子八皆器宇不凡長濟民職受司臺稱職孫玉璘善吟咏領鄉薦

舊志列隱逸今改入

案徐玉璘鄉薦無考

國朝

舒大儒字魯乙號一愚富仁人歲貢生生六歲而孤事母朝夕不離衣裙廁牕皆躬親浣濯順治甲寅寇起奉母逃難猝遇賊泣訴全母命賊感而釋之母年九十五卒大儒時已七十四猶號泣如孺子哀毀致疾疾革遺命以素衣冠斂初大儒家貧養必備物因灌園資給執韭甚美至今傳

爲孝子韭云 訂舊志

錢士琳字仲玉廂都人母漆氏早沒父大縉義不更娶士琳備極色養父年八十未嘗一日離左右知縣黃天球爲立傳子輝爲崇義廣文孫光祖貢生世濟其美人以爲孝行之報 舊志

漆瑗字席儒棠棣人世以孝友稱十四齡時其父懋枋被土寇劫去瑗痛激卽傾家所有抵賊營大呼曰鼠輩利吾財耳可負貲去速還我父賊居奇猶豫瑗髮直指目皆盡裂戟手厲罵誓不與俱生賊爲之膽落遂釋與俱歸事具司徒宜所作瑗父子合傳 新補

羅光德下安人母張氏病篤光德割股和羹以進病頓愈順治十一年知縣胡璉造廬給扁旌獎十三年知縣陳有爲給穀絹銀兩康熙三年巡撫董衛國復頒給布帛二十九年知縣高克藩舉鄉飲耆賓並嘉賚焉 訂舊志

應一相廂都人父病割股以進病頓甦已而復病一相復割股其後母病亦如之前後三次父母存活者六年 舊志

熊埴字敷五號碩存明弼季子事母至孝母病癱緩十年埴負之出入不以假於婢媪與兄邑庠基友愛甚篤兄歿撫姪如子爲萬載學博有學租爲豪猾占據僅存空籍前任莫能清理埴以誠信感之竟自送還鄉居賑貧乏施醫藥

善行尤多著有青來閣集

舊志

舒春暹坊都人性孝友父病三載朝夕侍側父故教弟成名為諸弟完昏式好無尤遇歉歲施穀救饑全活者甚眾

增訂

舊志

舒時義字質存改字與仁忠夏人祖士俊贛縣廣文父正誠增生五葉素儒一經傳後時義生四歲而孤祖父母方在堂節母熊氏進士銓之女兒也青燈課讀紡績資生時義能刻苦自勵博學授徒藉修脯以為養事祖母甘氏年逾九十卒奉母曲意承顏母亦自忘其嫠焉後母死時義已充歲貢不復就試但杜門著書而已其舅稱其孝行比之

李密茅容云

新增

涂光簧字在中忠夏人基之長子性敏嗜學為名諸生事親孝父宦遊在外光簧以母多病未隨任奉母家居朝夕不離左右以時鮮良醫遂精研醫理自是母病服藥輒效壽臻大耋光簧每應舉子試一念及母即倉皇以歸不終場事孺慕之忱終其身如一日鄉里咸以孝稱之

府志

丁球字碩臣號近峯象湖人乾隆乙巳恩貢父文富有隱

德球生而啟樸力學能文累不得志於有司以經師教授鄉里尤諄諄小學一書每謂學者當求之日用行習間方有把握務遠好名皆非也人有稱其以田產讓兄弟事球

謝曰我以筆耕兄弟以力耕勞逸固迥殊矣何足稱耶聞者益歎服年八十三卒新增

舒希泮字文淵忠夏人自其父叔卽以兄弟義讓聞於時父節儉起家非餉客不食兼味希泮生具至性幼時肄業棲雲寺離家五里每黎明入市購肉手自作羹以進仍返寺讀書逐日來往不憚煩父怒止之則跪而請曰不如此兒無心於學也偕從兄某赴省試臨場兄病劇希泮卽伴歸不以誤試期爲憾後登乾隆甲午賢書人謂無愧鄉舉新增舒致逢熊仙人幼時母病晝夜焚香禱祝願以身代醫者需審痰味方肯投藥致逢卽嘗之母服藥頓愈爲伯父後本

生母沒廬墓三年以哀毀卒妻趙氏二十三歲守節遵遺命捐租百石爲書院田產亦見義之大者增訂府志

彙載割股孝行姓名

舒淑 生員忠夏人療母

舒志恭 南源人療母

舒有益 石馬人療母

舒春元 坊都人療母

鄭世文 益田人療母

舒春錦 坊都人療母

潛鯤化 東江人療父

舒士和 石馬人療父

舒亮訓 吏員石馬人療母疾愈邑令黃天球旌之

龔顯蘭 追里人療母

舒炎 生員富仁人療母

趙元正 熊仙人療母

以上舊志

李良玉 上安人 療父

李 虹 廩生良玉子 療父

羅人傑 原名亨 永生員 石馬人 療母

舒國松 忠夏人 療母

劉文波 盆田人 療母

龔學金 追里人 療父 療母二次

張其珦 下安人 療父

羅亨道 石馬人 療母

徐承桂 下安人 療母

舒式垣 下安人 療父

胡唐忍 南源人 療父

舒佩金 富仁人 療母

以上新增 俱據採訪核實呈報

高克藩論曰孝道甚大全之者甚難在人子不欲以孝名其門內常行又未可以孝許之今通邑所舉報者不過割股數人割股不得為孝以其毀親之體傷親之心且不可

以訓也但一念之誠可格鬼神擴而充之雖聖賢不外是焉人心不古子職多乖得其一節亦可風世今存其姓氏別為一條不徧列為傳者所以著孝道之全體也仍存其姓氏者所以著孝道之一節也由一節以勉其全體則光施邑乘端必賴之矣 舊志

義夫 附

錢大縉字章我廂都人中牟丞裕國子補邑諸生嗜學有聲年十八娶漆氏結褵十五載漆病沒大縉終身不再娶年八十七卒子士琳以孝稱 舊志

按舊志義夫兩人其一為明李尚書宗頤事已詳見尚

書本傳及夏夫人節烈傳中無須複述附記於此且一人亦無二傳之體也

鄧克成字集士棠棣人年十九娶妻孫氏伉儷甚篤結褵十一年生三子而孫歿時父母俱存屢諭其續昏克成家素優裕力足以具聘錢重懲衣蘆之戒竟守義終其身乾隆五十四年合邑舉報義夫

新增

處士

宋

劉子虛字君實以文學孝友稱隱於桃源山自號支離翁釋

善權賦古風十二韻贈之

人物志

按舊志子虛爲棠棣人善權贈詩見藝文

元

舒公平字廉夫一字獨頑宋衡州錄事參軍邦佐之後延祐間邑宰薦貢舉力辭不赴會官定戶籍公平奉命總復靖安諸鄉凡有田不稅無田虛稅之家悉以實報蒙惠者甚衆捕寇官軍至縣俘男女百餘公平捐貲飲食之言於主帥多獲免遇歲饑輒竭所積賑貸且命工斲材以給死而無棺者遠近深德之博涉經史於春秋尤邃然不苟作注釋每評論宋文推蘇明允第一學者稱之日平山先生祀

鄉賢

人物志

明

塗鉉字鳳韶號屏山熊仙人博通經史旁逮方伎之書莫不通曉居家以孝事親處鄉黨朋友一以忠信爲本遇荒歉樂於周急鄉人德之宣德間有司以賢良方正薦不就惟以邱園自娛嘗訓其子淮曰汝幸登科第尊榮有命操守

在己當竭誠報國毋戾祖訓淮後遂爲循吏

訂舊志

黃化清字源潔號淡庵生九歲而孤母陳氏鞠育成人以孝友著聞讀書好禮不慕仕進人多重之次子鉉選貢寧波府推官御史張楷撰化清墓表稱爲淡庵處士

訂舊志

舒鑑字廷輝號樗齋富仁人養望林泉不干仕進執親之喪

哀毀骨立人有以橫逆加之者笑謝之而已族黨交稱其

孝義宏治十一年詔舉山林隱逸之士知縣朱祚舉鑑以

應辭不就十八年知縣張伯祥奉例給冠帶亦却之年逾

八十卒

訂舊志

舒鎮字廷節一字思誠富仁人初習舉子業以父宦遊兄罹

疾遂棄去總家政勤苦質儉待宗族訓子孫以禮義每朔

望集長幼詣祖祠拜謁自壯至老不怠遭華林賊拘繫復

被宸濠囚禁皆不屈好賢樂士周卹貧乏賑饑掩骼之事

尤多正德丙子當事廉其賢舉鄉飲不赴

訂舊志

陳大鴻字漸之益田人質直好義鄉里貧乏者稱貸不責其

嶺南縣志 卷之十一
償立義館聚鄉族貧子弟教之季子文任知縣治行有聲
嘗訓其子孫曰汝曹只是守分勤讀書毋外慕爲也邑令
賢之屢請鄉飲不赴坐臥一小樓焚香讀易別號東臆懶
人新安御史汪道昆銘其墓 訂舊志

國朝

甘體元字汝諧東江人寄情山水不慕榮名餼上庠有年人
勸其需次明經可得官體元飄然長往以廣易參同契遺
其子不知所終 舊志

舒觀字瞻子坊都人性情孤介生平無苟行尚論古人是非
不肯少假補弟子員教授鄉里不事生產陶然詩酒有古

高士梗概

舊志

舒大綱字冠卿富仁人明季爲諸生有聲督學蔡公雅重之
辛酉以後隱居林泉閉戶著述父歿遺產悉以與弟教授
鄉塾從游者甚眾著有尚友居詩文集 舊志

趙元輝字三英追里人文同四世孫爲諸生博通今古有經
世之志集史傳中名臣儒將爲經文緯武二集遭時不偶
隱於鄉里好義篤行從弟某妻甚爲之完娶遺一姪復爲
昏配並割產贍之有余甲因貧鬻子元輝贖之以歸知縣
屠尚黃天球素矜慎不輕許可人於元輝獨懸榻焉 增訂舊志
周崑字嵩長自號草窗子少隸諸生籍旋棄去居貧守約蕭

然自得雅以吟咏自娛工篆隸書能入漢人之室刻畫花
石銅魚諸古器曲肖物情邑孝廉舒亮衮贈詩高其獨行
熊進士銓亦稱爲城南畸人著有集古新編自笑吟集同
時有逸士舒亮芳與崑齊名人目爲小三絕

李清字延白邑之三樞人明尙書李公叔正後裔爲人淳古
澹泊安貧樂道帶經而鋤少籍諸生試文深入理奧名傾
士林顧獨不喜于進邑大令慕其名欲羅致引重不輕投
謁也窮居好學深思每一鐙危坐玩索先儒性旨旁逮山
經路史靡不淹通自謂生平得力尤在周易近思錄二書
中歲益精著學淡於世事遇人物我渾忘有鄰子築室侵
其基址旁觀爲之不平清笑謝曰彼佔我地能佔我天平
竟不與校迄今道軼事者猶想見李先生德量云

舒時浩字向若自號述庵忠夏人國子生性行誠篤自幼家
貧好讀書弱冠失怙母善病因棄舉業習岐黃家言母以
壽康鄰里求之者亦時往應不輕受餽遺並工青烏術嘗
謂此二事本人子所宜知吾以求無悔而已平生取與極
矜慎遇貧乏者輒傾囊贈之嘗減己口分穀以賑饑待鄉
黨宗族惟謙收人或侮之不與爭且曰當學卑虧寒山拾
得之語可味也子二分業文武長孫化民以名孝廉令山
左有聲孫曾亦世其家學浩夫婦同登大耋而終

舒麟祥字玉書號韻窗振甲仲子性清尚而厚於仁少隨父
任不慕華靡旋侍母疾歸里色養備至友于兄弟最篤處
族黨務謙抑自下自幼記誦過人讀史不放過一字顧淡
於仕進亦不問家人生產坐是速貧然見人饑寒疾苦如
患在身常稱貸而與有莊佃王某積租欠多年王不自安
將鬻子爲僧以償麟祥聞急慰止之焚其負券仍與佃諸
類所爲皆身受者告人言也其平居教子弟以行誼爲先
顏所居室曰靜觀有蕭然自得之意中歲長子懋官成進
士令粵東迎養官署養不許豐但問讞獄有所平反則喜
曰惜一日民命勝於萬鍾祿矣垂老歸鄉子若孫相繼登

科第麟祥日置酒招鄉父老歡然道故時或棕鞋桐帽倘
徉郭外山水雜漁樵與談古事見者不知其爲封君也壽
至八十七無疾而終

以上新增

善行

明

舒欽字廷正別號清溪知府敬之孫簡言啟行好義輕財鄉
族多稱爲長者年七十未嘗一至公門人或侮之從容責
以義絕不與校愛植松灌沃成園有鴛鴦來巢禁童僕毋
破巢取卵一日盜至門見所示禁嘆曰愛物如此愛人可
知感愧而去化爲良民

舊志

舒榆字汝孝號紹峯幼從父清宦遊博交俊傑補邑庠屢冠
多士胸次磊落不羣有急難輒傾囊爲之排解人多以遠
到期之

舊志

趙廡字國賢號雲峯經歷炳之子性狷介在庠三十餘年能
安義命篤行孝友以恭儉訓子孫不輕履公庭賑貧乏重
義輕財有古長者風

訂舊志

舒桓字汝抑號繡峯通習經史絕意榮祿以孝義稱於時尤
慷慨輕財一日家人路拾遺金卽命訪還其人人皆義之

舊志

國朝

徐士堯字唯則追里人六世同居誼篤宗族好善樂施乾隆
十四年黃制軍訪查善人公舉詳報勒名旌善亭

舊志

舒亮文字亦章石馬人居家孝友力行善事捐建學宮戟門
有功學校合邑舉報善人勒名旌善亭

舊志

程時賢礪都人持身端方非公不履城市修理圯橋塌路合

邑舉報勒名旌善亭

舊志

余久英字傑士東江人性恬退家不饒於貲而好爲義舉修
通衢石道建石橋皆費數百金爲之乾隆壬辰學使曹文
植闢南昌考棚久英首倡捐費集事曹善之爲勒其名於
石己亥知縣張龍占舉鄉飲合邑紳士交推久英固辭不

就以子光瑞職封登仕佐郎長子光瑞克承父志亦以
好善聞於鄉

府志

舒際昌字應五號敬亭熊仙人由貢生授主簿加州同職銜
舉嘉慶元年鄉飲正賓自其祖父以忠厚起家饒有田產
際昌承之以謙退未嘗與人爲忤有犯之者泊然不校也
性好善乾隆丙子歲饑以所餘食穀減價平糶不給復於
他邑買米三百石以足之丙午邑復旱又倡捐穀一千二
百石平價以賑凡學宮書院靡不首先倡捐其他捨藥施
棺修橋渡茶亭諸義舉不能縷述約計前後所費近萬金
嘉慶十六年邑令馬廷燮彙案詳請奉

旨旌善人給銀建坊兄際元字步虞任當塗縣丞有幹濟才
弟際盛字隆周太學生睦嫻任卹稱其家風

舒翼字志曾號樹亭熊仙人授職主簿家素饒樂於行善凡
修縣市西城內牆根及山口魯崖乾灘樵山坳黃田張背
嶺各郵莊道路共四百餘丈子藹春授職州同亦修南港
墩李洲坳樟樹下虬龍庵諸處要路共二百八十餘丈費
俱多金鄉人德之

熊祖字廓野號松溪新興人授職州同家世席素封其父卽
多善德祖能承其志凡邑中賑濟饑荒及修建學宮書院
率首先捐輸無恹色鄉間有貧乏者求之輒應尊師好士

子燧後舉於鄉

舒丙杜字敬修富仁人授職州同家不甚豐而慷慨好義捐修四門環城石路躬自督工未畢事而疾亟遺命子孫成之費至千金行路無不稱便今猶以時補葺焉

余光瑁字次玉久英次子授職從九嘉慶十九年捐修東門外晉省通衢石路凡四百八十餘丈費五百餘金人謂其好善有父兄之風

涂逢炳字季方熊仙人少恢濶有肆應才業鹽筴積至饒裕能調人之急族戚皆樂依之遇地方公舉亦樂於趨事嘗捐造長靈洲石亭以憩渡者亦善行之一端也長子翼燕

舉人以四子承燕州同職請

封儒林郎

鄭映川原名滋以字行南源人授職州同席先人薄產習勤苦積累至田租千石捐百石爲合邑生童應試卷資又爲本都甲長捐置厰會以備輪充之費里人皆拜其德其他置祖祠祀田修鄉里橋路善事甚多力行不倦

舒崇鏡字鑑遠忠夏人家貧無儋石而好善出於天性見人輒誦誦談陰騭事自以少未讀書路過片紙隻字必拾襲以歸聯惜字會月一收燬邑中凡有工作不惜身任其勞如修府學敬義堂及石磯堤壩沙河橋渡皆倚辦焉毫無染指其他零星粘補并竭已資以成之嘗自言吾藉人財

以成事而顧惟利是漁匪徒負人先不堪自問矣人謂其語非虛以上新增

本清甲辰歲置局會以善命
苦蕪果至田賦千石能百石為合昌主童烈結卷資又為
獲知川烈谷慈以字許南感人對鄰州同報夫人蕪室皆謹
舉人以四千承燕州同鄰結 桂謝林廂

附諸善行姓名

舒 焜 富仁人從九品職捐修萬坊石路五十丈

姚宗科 追里人乾隆癸丑大水捐資掩骼四十餘口

余久豪 追里人監生乾隆癸丑大水捐資掩骼三十餘口

陳之芬 風扁式 人道光二年族人在府舉報善行給有任郵可

徐國理 追里人里人舉報善行



靖安縣志卷之十一

人物志下

列女 貞烈

元

李宗頤妻夏氏名琬常儒家女至正十八年陳友諒寇龍興氏匿居後圃中賊至挾其女共投井死 元史

按李尚書為有明名臣其夫人死節在元時舊志列於明代殊誤此傳全採元史本文舊志載夫人為宋夏文莊公竦六世孫女後葬於新建善政鄉並附記之

明

陳氏字若英高安人許配靖安舒璉璉以正統間隨父知府
敬宦嘉興卒於道喪還若英聞之悲慟不欲生母憐而解
之乃救淚潛入寢室自經死時年十九舒母迎柩合葬白
粉山詔旌其門曰貞烈 豫章書

按舊志陳氏名娥吉水殿撰劉儼爲立傳永新大學士
劉定之有贊其他題咏甚夥茲酌存之見藝文

舒銓妻余氏早寡有寇至欲執而辱之余自墜溝壑曰我名
家子寧死不受辱罵不絕口賊怒殺之 豫章書

按銓乃邑之富仁都人豫章書誤作南昌

生員涂崇儀妻淦氏涂崇位妻張氏俱熊仙人崇禎癸未流

賊擁眾劫掠舉家登樓賊聚薪焚樓呼二氏下樓免死二
氏罵曰寧與夫俱死不與賊俱生遂遇害事聞各憲旌之
舊志

國朝

舒烈女名乞秀富仁都舒成三女年十五順治五年鄧賊陷
城逼之不從口嚙賊手賊怒殺之 舊志

舒其任妻陳氏忠夏人順治戊子鄧賊逼汚不從赴水死 舊志

舒維謙妻錢氏順治戊子遭鄧寇夫婦被執賊殺謙欲遂辱

氏氏堅不從抱夫屍哭賊怒時氏有娠賊剖其孕而死 通志

舒調熙妻朱氏坊都人順治戊子鄧寇破城賊執熙氏從隙

處窺見挺身出救夫賊釋熙而執氏氏不屈罵賊而死舊志
胡顯廉妻周氏東江人年二十八遭鄧兵亂被執逼令相隨
氏堅不從卒見殺舊志

熊作霑聘妻余氏年十七未嫁聞作霑病白父母往視比入
門夫不能言氏撫摩良久竟甦越三日死母家以未成婚
禮迎之歸氏曰我爲熊氏婦矣萬無歸理數載伯兄生子
舅卽立爲氏後氏撫而教之又數年氏卒府志

舒貞女父某因貧入軍伍挈眷居會城家累數口月給銀米
不足供同伍沈氏子時時周其急如是者數年父老且病
圖歸計無宿春資沈復典質助之歸父感其惠以貞女許

之時年十五六矣歸數月父卒遺命諄諄毋負約其從叔
某貪而狡欺其弱欲居爲奇貨謂其母曰女明慧如許何
乃作兵卒婦母意爲動貞女誓曰背德不祥違命不孝有
死無二已而沈來就昏叔故厚索聘金沈計無所出且知
其叔之善訟也竟辭去母將議他適貞女知不可奪闔戶
自經死邑進士熊銓爲立傳

萬迭練妻程氏歸萬生期年伉儷甚篤無何萬病綿延者三
載氏爲延醫祈佛無虛日偶歸寧泣白其母曰壻疾若不
起必身殉母慰諭之女曰兒無子恐舅姑不諒奪我志可
奈何不如死之爲愈也已而萬疾卒不起氏經紀其喪附

身附棺之具皆親自簡點洎葬送柩至山遂自縊鄉里稱
爲女文丞老儒曾煜爲之傳

閔定杭聘妻陳氏幼抱養於閔十餘歲未成昏而定杭故兩
家父母憐其少議欲嫁之氏謝曰妾身雖未分明固已拜
姑嫜矣不敢從命守數年又有欲奪其志者氏以死自誓
憂鬱成疾年垂三十而歿

周秋烈妻楊氏礫坑人饁耕田間路經山僻處猝遇強暴氏
怒詈不從爲暴及傷要害歸而泣告其姑曰婦不能復事
母矣逾日死官爲置暴於法嘉慶二十五年題 旌以上
新增

列女 節孝

明

舒宏道妻王氏年二十八而寡子三皆幼王撫孤成立長子
仲甫娶陳氏生男未週歲而仲甫卒陳亦志操不二兩女
長曰靖正適本邑項坊張次日靖貞適奉新某俱早寡從
一而終人謂舒門四節 舊志

校通志僅載舒仲甫妻陳氏旌

舒克正妻况氏伯律太守之孫女歸舒而無子勸其夫納妾
生子詔未幾克正卒氏年二十守節至八十歲而終 舊志

汪庸妻張氏庸卒氏年十七其母勸之他適不從至七十而

終 舊志 通志旌

生員趙進妻程氏年十九守節至八十終 舊志 通志旌

張萬英妻舒氏年二十守節事舅姑惟謹兄勸其再醮不從至八十卒 舊志 通志旌

舒銳妻黃氏富仁人夫故時氏年二十三哀毀特甚三月生

遺腹子洛撫之成令名至七十完貞人無間言 舊志 通志旌

舒綱妻宋氏青年守節撫子沐成立沐娶妻余氏年二十五而沐又喪遺腹生孫國仲宋氏與媳矢志靡他以養以教

宋年八十二而卒余年七十餘卒嘉靖二十四年巡撫顧其言題旌建坊曰雙節 增訂舊志

錢波妻項氏廂都人年二十一生子朝陽甫三月而波卒教

之成立補弟子員卒年九十三歲 舊志 通志旌

漆維縉妻何氏棠棣人年二十守節八十四歲卒題旌 舊志

生員舒如英妻王氏坊都人年十七守節萬曆四十四年巡

撫陳于庭題旌 舊志

增生舒一達妻謝氏富仁人年十八歸舒善事舅姑閨闈雍

肅年二十舉子鏐後二年一達卒匝月復舉遺腹子鑽集

蓼茹荼教養兩孤數十年如一日鏐後領鄉薦鑽補增廣

生氏年五十有八 舊志

涂三七妻趙氏年十九夫故守節天啟間旌表坊額曰奕世

流芳 舊志

舒敬德妻詹氏石馬人年十九夫故鞠育二子守志不渝崇禎二年巡按邢公給扁旌獎賞曰十九而守孤帷七旬而喪二子甘貧守節督家婦以課孫矢志靡他歷耄年而無異 舊志

生員張彥遜妻蔡氏旌 通志

生員舒獻臣妻余氏旌 府志

國朝

生員舒志浩妻陳氏廂都人年二十六夫故守節勤苦育子教讀父書子三焯梓俱貢生鎮庠生氏卒年八十六 舊志
生員陳舜全妻徐氏益田人年十九夫故二子方在襁褓又

舉一遺腹子矢志撫孤事舅姑克謹摒擋家政數十年備嘗艱苦三子以瑾以瑜以玠俱入學為名諸生後復相繼殂謝氏以教子者教孫並皆成立卒年九十有四知縣高克藩詳請旌獎 舊志

廩生陳以瑜妻廖氏即徐氏子婦年二十二夫故氏仰事俯育孝慈交至于之鏡亦庠生氏卒年六十一與姑並稱雙節 增訂舊志

增生舒顯縉妻涂氏富仁人年二十四夫故守節家貧甚茹荼自甘先後事三姑俱以孝謹聞遭家多故叔姒早歿教子撫姪皆克有成子大儒貢明經康熙辛未知縣高克藩

詳請旌獎督學邵公給扁曰松風筠節 舊志

涂星婁妻張氏忠夏人年二十六夫故哀毀絕粒幾不欲生

孀居六十餘載冰操始終如一勤績課子至孫玠遂領鄉

薦順治三年知縣楊泰給扁曰峻節凌霄 舊志

舒文鋒妻帥氏年二十四夫故遺孤春育甫二歲撫之成立

春育娶妻閔氏年方十九而春育病亡閔矢志如姑貧窶

日甚節操彌堅帥氏卒年七十三閔氏卒年六十二知縣

張慎行給扁曰名門雙節 舊志

程柯二妻舒氏年二十夫故守節六十七而卒知府胡公給

扁旌之 舊志

雷時映妻舒氏年二十四夫故守節家貧以女紅自給有憐

而餽之者拒不受納諸孤於一室不令別處其貞操類此

臬司給扁旌之 舊志

生員項銓妻龔氏年二十六銓故家貧無子矢志守節卒年

六十二 舊志

生員涂星煜妻周氏年二十三夫故守節撫孤有成卒年七

十八 舊志

生員趙日正妻舒氏年二十四夫故毀容守節卒年六十四

藩司王公給扁旌之曰貞節維風 舊志

生員涂鼎甲妻廖氏年二十四夫故子僅六歲撫孤守節年

八十卒 舊志

生員舒煇妻廖氏名雪松奉新貢生廖雲女母徐氏夢彩鸞而生少淑慧通書史年十九歸煇凡八年而煇卒守節撫孤自課二子慕芬慕芳勵行積學早餼於庠康熙四十六年督學楊公題請 旌表後慕芬舉孝廉方正治奉賢有聲慕芳拔取明經廖年九十視聽猶不衰族長均以爲巾幗人瑞云 舊志

生員涂璋妻舒氏年十七歸璋紡績佐讀璋病舒割股和藥以進服之不愈竟卒舒年二十五遺孤基生纔三月撫之成立雍正四年題請 旌表子基舉人任南海令孫光範

任鹿邑令曾孫寧先登進士任桐城令三世郎官咸謂節母所貽也 增訂舊志

生員舒國正妻余氏二十五歲夫故食貧守節蘋藻事先如夫在日撫二孤長子羽健補邑庠艱苦備嘗清操足式題請 旌表 舊志

生員漆學遜妻舒氏二十五歲守節甘貧育一子子亡育孫勤苦一生撫孤兩世題請 旌表 舊志

應大德妻周氏年二十夫故守節百折不回紡績課子子勗名重膠庠羣推氏德之報題請 旌表 舊志

生員涂進之妻余氏二十五歲夫故守節撫二孤成立懷清

履潔人無間言題請 旌表 舊志

舒亮楷妻劉氏二十七歲守節撫孤成立爲之婚娶未幾子

又喪復撫二孫家難屢遭清操彌苦題請 旌表 舊志

增生舒正誠妻熊氏舉人明弼之女孫增生基之女適舒八

載生子時義甫四歲而夫故氏欲以身殉舅姑諭以二老

無供一孤誰哺因勉存視息辛苦支持子職父綱一身並

任守節二十七年完貞五十一歲題請 旌表 舊志

漆鳳翔妻徐氏年十七喪夫舉遺腹子學仁比娶婦生孫而

學仁又喪撫孤兩世二孫皆克成立題請 旌表 舊志

漆鳳來妻舒氏年二十四夫故課子成名持家有法識大體

廣布施苦節仁心垂老不忘孫曾蕃衍皆氏所貽也題請

旌表 舊志

廩生舒運珽妻宋氏年二十七夫故遺孤照纔二歲家本貧

至是窘甚日食不給或爲之危弗恤也日藉女紅所入上

奉孀姑下育稚子照後充選貢孫曾林立時以勤儉最之

題請 旌表 訂舊志

舒時俊妻劉氏年二十八夫故家貧勤鍼藉以育諸孤苦節

可風題請 旌表 舊志

舒運幹妻陳氏高安赤土村之巨族也歸舒年二十四而寡

家甚貧勤操作以事翁姑撫孤子寧能成立題請 旌表

舊志

徐廣文妻涂氏年二十四夫故無嗣為之立繼守節至白首

完貞題請 旌表 舊志

舒斯奇妻余氏夫故遺一子甫成人又喪遺一孫撫孤兩世

食苦不言題請 旌表 舊志

涂星收妻李氏年二十五夫故食貧事孀姑以孝聞題請

旌表 舊志

涂楠妻余氏年二十七夫故家貧撫兩歲孤兒成立題請

旌表 舊志

舒亮繼妻涂氏年二十五夫故繼夫兄子為嗣撫之成立守

貞至七十餘歲而卒題請 旌表 舊志

生員曾應舉妻鄭氏年十七守節柵外不聞其聲事姑孝教

子嚴好行善事皆有可稱題請 旌表 舊志

蕭斯鳳妻舒氏年二十七夫故守節事舅姑克孝教二子有

成題請 旌表 舊志

熊軾妻應氏年二十二夫故內無期功之親氏矢志堅貞奉

孀姑舒氏不辭况悴姑以天年終撫子羽力學遊膠庠人

謂守節之報題請 旌表 舊志

按熊銓潔堂文稿有雙節傳載軾父名子成隨父良宦

遊吉州舟覆象牙潭溺焉妻舒氏年十七守節撫孤至

八十卒舊志爲軾妻應氏立傳僅附及其姑茲爲詳記
於此用當補傳

舒維濂妻葉氏夫故守節奉姑孝養訓子義方題請 旌表
額曰清標彤管 舊志

舉人舒亮妻宋氏奉新進士宋士琇之女孫文學坤之女
也歸亮裘爲再繼室先是裘之亡室周氏遺一子振甲寄
乳於妗母宋氏人門後抱歸保育如已出裘好學而善病
藥竈茶鐺氏事之備謹旣而裘以疾終氏年三十孤子十
三齡勵節支撐內政不合子以俗務紛心俾奉叔教成立
振甲歷任州縣著循聲宋氏每歲節家用寄助薪俸以成

子之廉族黨並稱賢母氏孀居四十餘年言不踰閭壺範
傳焉累 封太宜人因命婦遵 制未請 旌門

生員舒涵妻劉氏年二十八涵病故氏誓以死殉舅姑力勸
止之事舅姑必誠必敬姑患目將盲醫不效或謂之曰舐
可復明氏日夕舐之姑目果瘳人以爲孝感初夫歿時有
勸氏改適者氏取翦自毀其面曰吾寧改面不改心也聞
者酸鼻子衷舉人氏年七十餘卒乾隆四十一年題 旌

府志

生員舒琮妻周氏年二十八夫病割股和藥以進卒不起子
克寬年甫八歲氏督課之爲國學生娶妻余氏生三子年

二十六克寬亦歿婦姑雙節人以為難周守貞四十九年
余三十一年克寬子懋健孫承烈俱登乙科苦節之報蓋
不爽云 增訂府志

閔起官妻葉氏年二十一夫故遺子甫數月舅家貧且憐其
寡議改適肩輿至門氏聞之佯為修飾者懷其子從後戶
奔赴母家得不嫁卒撫孤成立守節五十四年 府志

舒天燦妻徐氏青年守節孝義兼全阨窮堪憫乾隆二十六
年題請 旌表

張招妻余氏招故貧氏年二十四來歸結褵三載而夫卒氏
脫簪珥以斂時翁姑俱存曲意承養遺孤在茲督之嚴不

時鞭撻鄰婦疑其有異志嗾於姑氏聞持刃自明姑奪刃
則已自傷腮腴見者無不肅然年躋八十而卒子在茲孫
景葵皆有聲於庠乾隆四十三年題 旌

陳之琰妻徐氏年二十夫故事孀姑唯謹姑患痰病手足不
能舉氏侍湯藥者三年無怠色鞠子婚配皆出自紡績之
資年逾七十而終乾隆四十七年題 旌

貢生趙廷寬妻周氏廷寬五世單傳至寬無子病三歲不瘳
氏為繼夫族兄子為嗣復慮其羸弱并繼一族弟之子已
而廷寬歿氏年二十八歲奉姑育子白首完貞乾隆四十
五年題 旌

王萬進妻趙氏年二十四夫故無子繼夫兄子爲嗣勵志撫孤六十九歲而卒乾隆五十年題 旌

監生余蘭妻鄒氏年二十三夫故遺一子相繼而夭繼夫兄子元卜爲嗣撫之成立補邑諸生旋復下世撫孤孫督課不少懈孝事翁姑俱登上壽氏亦白首全貞乾隆五十九年題 旌

舒鍵妻李氏年二十一夫故無子遺一女夫弟尚幼上有祖姑暨翁姑具存氏力任家政與祖姑居處俟叔娶婦舉子卽繼爲夫後茹藥飲冰一生勤苦現存八十歲嘉慶九年題 旌

舒瑞麟妻熊氏奉新歲貢生應占之女歸舒四載而夫故兒甫三歲氏又有娠遺腹生一子長子復殤撫遺腹孤子星熙成立爲名諸生中道摧折又復課孫孫穎才亦入縣庠氏屢罹困苦勁節不少衰事舅姑能先意承志舅晚年目盲出入親自扶持性靜默非至戚罕覩其面鄉黨無間言嘉慶十年題 旌

劉賢璞妻李氏年二十二夫故守節敬事翁姑恩育孤子嘉慶十四年題 旌

項文林妻舒氏年二十七夫故氏時有身已而生女繼夫兄之第五子麟爲嗣麟後入縣庠與其同懷兄杰鵬兩孝廉

同有文名氏事姑惟謹教家極肅杰每與人論巾幗賢淑
輒稱其叔母云嘉慶十七年題 旌

監生舒斯模妻周氏斯模患咯血疾數年無嗣氏急爲之納
妾果舉一子夫故氏年二十八事姑育子皆出自紡績中
凡園圃井臼之事靡不親操其勤儉有過人者子元楨監
生早下世夫妻子婦亦相繼而歿撫孫至六歲殤繼一孫
復殤又繼一孫今已爲之完配矣氏所遭備極困苦而卒
以堅忍成其節現存六十六歲見者無不敬之嘉慶二十
一年題 旌

王斯信妻涂氏年二十夫故伉儷未久僅一女氏勵志守貞

事姑孝謹繼夫兄子爲嗣孫枝林立人謂其節孝之報嘉
慶二十一年題 旌

熊承泮妻舒氏年十九夫故僅一女氏弱齡守節人多難之
氏毅然爲夫立繼教養成立中道而殤復撫孫課讀入縣
庠宗族悲其遇更稱其賢道光二年題 旌

雷紹性妻熊氏父之輜早歿母劉氏以節稱氏歸雷五載而
夫喪時年二十七秉承母教一意守貞事舅姑能得歡心
姑壽躋九十而終教子撫孫恩義兼至現存七十二歲道
光二年題 旌

合例待 旌節婦

劉士楷妻舒氏

舒一越妻張氏

趙士銓妻劉氏

周全二妻趙氏

舒顯道妻涂氏

趙士賢妻涂氏

生員周文任妻劉氏

生員舒淑妻甘氏

應君政妻舒氏

舒煥妻漆氏

舒顯龍妻陳氏

徐孟柱妻余氏

余孟學妻漆氏

涂彩榮妻趙氏

舒河妻熊氏

陳以柏妻甘氏

舒斯敬妻涂氏

舒斯晟妻陳氏

生員熊楚材妻舒氏

陳以汴妻舒氏

趙殷祥妻胡氏

涂遇妻舒氏

涂祚栢妻舒氏

胡濼妻涂氏

涂毓偉妻舒氏

涂祚椿妻舒氏

涂祚材妻舒氏

涂彩龍妻戴氏

曾奎妻舒氏

閔起瑞妻黃氏

涂毓涵妻熊氏

曾文登妻葉氏

曾大鵬妻錢氏

舉人錢士玠妻陳氏

舒采預妻宋氏

周春瑞妻蕭氏

錢泮妻閔氏

潛日陞妻項氏

舒正忠妻錢氏

舒斯和妻熊氏

舒斯貞妻湯氏

周明奎妻陳氏

周鈞楠妻舒氏

涂瑜妻余氏

涂祚道妻項氏

黃學顯妻鄧氏

涂毓莘妻張氏

舒春妻陳氏

生員涂珊妻漆氏

葉二旭妻舒氏

舒亮灝妻張氏

陳天爵妻徐氏

舒亮汎妻王氏

以上舊志

生員舒泰來妻古氏

胡其杭妻趙氏

孝子舒致逢妻趙氏

舒采捷妻李氏

張紹樞妻丁氏

周忠節妻閔氏

監生涂光簠妻舒氏

周恭公妻余氏

以上已酉府志

舒先燁妻徐氏 年十九守節 九十歲完貞

涂光鑲妻王氏 年廿八守節 現六十四歲

張修茂妻洪氏 年廿八守節 現八十二歲

張克誠妻余氏 年廿三守節 五十三歲完貞

涂啟尙妻閔氏 年廿四守節 七十二歲完貞

王大豪妻李氏 年廿六守節 現五十五歲

以上俱道光三年在府呈報給扁發縣查明

舒笙妻漆氏 年廿六守節 六十六歲完貞

生員舒紹傑妻黃氏 年廿二守節 七十歲完貞

監生舒元學妻宋氏 年廿四守節 七十三歲完貞

舒致倌妻項氏 年廿三守節 現年七十歲

舒式駟妻徐氏 年十八守節 現七十六歲

舒式典妻閔氏 年廿六守節 七十四歲完貞

涂人駒妻舒氏 年十八守節 四十六完貞

舒希楫妻黃氏 年廿七守節 現五十六歲

監生舒亮棋妻漆氏 年廿九守節 八十一完貞

舒羽顯妾張氏 年廿一守節 七十一完貞

趙伯洪妻劉氏 年二十守節 現六十五歲

舒璞妻漆氏 年二十七守節 現五十三歲

生黎民泰妻舒氏 年廿八守節 八十三完貞

舒而瑞妻雷氏 年廿七守節 現六十五歲

舒一榆妻陳氏 年廿五守節 現五十六歲

漆其沂妻應氏 年廿三守節 現五十二歲

漆元炯妻黎氏 年廿四守節 現五十四歲

漆啟元妻李氏 年廿八守節 現六十三歲

漆元耕妻舒氏 年廿六守節 現六十一歲

漆其萍妻萬氏 年廿四守節 現五十四歲

漆宗蘇妻舒氏 年十九守節 五十五完貞

漆宗梅妻舒氏 年廿二守節 現六十六歲

李述恭妻涂氏 年廿七守節 現五十三歲

李春松妻錢氏 年廿七守節 現六十六歲

舒克齊妻梅氏 年廿九守節 五十三完貞

劉顯思妻萬氏 年廿六守節 現五十二歲

况家球妻舒氏 年廿五守節 現五十三歲

胡祥棠妻凌氏 年十九守節 現六十七歲

李興松妻陳氏 年廿四守節 五十五完貞

胡唐稅妻黃氏 年十四守節 現五十四歲

胡世芹妻劉氏 年廿四守節 八十四完貞

劉顯芳妻李氏 年廿六守節 現五十六歲

涂遇隆妻王氏 年廿五守節 七十歲完貞

劉世訓妻舒氏 年廿三守節 現八十二歲

孫學芳妻漆氏 年廿六守節 七十九完貞

侯亦春妻舒氏 年廿九守節 現五十五歲

侯春濬妻李氏 年三十守節 七十八完貞

孫志錠妻鄧氏 年廿二守節 現七十二歲

胡在祿妾陳氏 年廿四守節 現五十七歲

黎懋林妻舒氏 年廿五守節 現五十五歲

盧欽義妻萬氏 年廿一守節 七十三完貞

甘宏璞妻涂氏 年廿四守節 現六十四歲

甘宏瑛妻徐氏 年廿八守節 現五十七歲

李善麒妻萬氏 年廿八守節 現五十四歲

熊得禮妻陳氏 年廿八守節 現六十三歲

李善謙妻彭氏 年十九守節 現五十六歲

黃紹瑾妻劉氏 年二十守節 現五十七歲

李仕銑妻鄧氏 年廿九守節 現七十二歲

戴佐松妻萬氏 年廿四守節 現五十四歲

生員劉城妻高氏 年廿八守節 現六十一歲

涂祚杲妻丁氏 年廿九守節 現七十七歲

涂光熹妻趙氏 年廿五守節 現五十二歲

舒希鎬妻徐氏 年廿九守節 現六十三歲

舒希達妻吳氏 年廿三守節 現五十二歲

舒羽虹妻劉氏 年二十守節 現六十七歲

舒而遂妻李氏 年廿九守節 現六十歲

舒遇昱妻項氏 年廿一守節 現四十一歲

舒而賢妻陳氏 年廿八守節 現八十歲

舒羽耀妻張氏 年廿七守節 現八十歲

舒羽燁妻錢氏 年二十四守節 現八十四歲

鄧克輝妻萬氏 年廿五守節 現八十六歲

蔡兆挺妻謝氏 年廿九守節 現八十四歲

劉之賞妻何氏 年廿八守節 現六十八歲

鄧陞龍妻漆氏 年廿五守節 現六十三歲

涂祚科妻余氏 年廿八守節 現六十二歲

會廷富妾漆氏 年廿二守節 現六十二歲

武生漆紹宗妻徐氏 年廿七守節 現六十七歲

涂祚良妻陳氏 年廿三守節 現七十二歲

生員黃裳妻涂氏 年廿七守節 現年六十歲

涂光表妻黎氏 年廿八守節 現五十一歲

胡承炬妻趙氏 年廿九守節 現五十六歲

胡承煥妻蕭氏 年廿九守節 現六十六歲

胡顯燿妻李氏 年廿八守節 現七十四歲

黃第英妻王氏 年廿五守節 現五十三歲

武生王學元妻舒氏 年廿九守節 現五十六歲

徐日紅妻余氏 年廿三守節 現六十四歲

熊求章妻任氏 年廿四守節 現八十歲

徐承燧妻趙氏 年廿一守節 現五十五歲

徐開祿妻劉氏 年廿九守節 現六十四歲

涂立貴妻舒氏 年廿五守節 現五十二歲

張愈鎔妻余氏 年廿八守節 現七十九歲

漆其萃妻舒氏 年廿八守節 現七十二歲

舒斯預妻趙氏 年廿四守節 現四十一歲

舒清琳妻羅氏 年廿九守節 現四十四歲

趙伯江妻余氏 年廿七守節 現六十一歲

陳崑賓妻劉氏 年廿四守節 現五十六歲

李厚沅妻趙氏 年二十守節 現五十六歲

劉漢文妻周氏 年廿七守節 現七十九歲

李博遵妻利氏 年廿七守節 現五十二歲

胡一禎妻鄭氏 年廿七守節 現七十七歲

生張愈松妻錢氏 年廿五守節 至七十完貞

熊求恭妻趙氏 年廿二守節 至七十完貞

胡一綬妻郭氏 年三十守節 現五十九歲

熊得智妻孫氏 年廿八守節 四十八完貞

余以禮妻陳氏 年廿四守節 七十八完貞

鄧士桃妻陳氏 年廿四守節 六十二完貞

生鄧一棟妻熊氏 年廿五守節 現五十五歲

趙廷簡妻余氏 年廿五守節 現七十七歲

羅福祐妻舒氏 年廿三守節 七十三完貞

曾兆興妻王氏 年三十守節 現年七十歲

彭良淇妻周氏 年廿三守節 現六十六歲

羅福詮妻熊氏 年廿五守節 至六十完貞

張愈鼎妻陰氏 年廿四守節 五十四完貞

張紹驥妻涂氏 年廿三守節 至八十完貞

張顯武妻魏氏 年廿八守節 八十二完貞

張愈楞妻陳氏 年廿三守節 七十一完貞

陳正增妻趙氏 年廿九守節 現五十八歲

蕭繼輝妻熊氏 年廿四守節 現七十六歲

閔起選妻蕭氏 年廿一守節 七十六完貞

鄧陞相妻舒氏 年廿九守節 六十四完貞

陳正經妻趙氏 年廿四守節 現五十八歲

張春寬妻熊氏 年廿四守節 現五十九歲

余黃媚妻舒氏 年二十守節 六十二完貞

舒亮璉妻余氏 年廿九守節 五十三完貞

舒克鈔妻熊氏 年十八守節 六十六完貞

張愈愔妻熊氏 年廿八守節 現六十一歲

熊維境妻余氏 年廿八守節 七十二完貞

熊維球妻舒氏 年廿八守節 六十八完貞

熊維瀧妻閔氏 年廿八守節 八十二完貞

熊求珍妻吳氏 年廿九守節 四十五完貞

漆宗桃妻余氏 年廿二守節 現年八十歲

熊維季妻舒氏 年廿九守節 五十三完貞

熊作興妻舒氏 年廿六守節 六十六完貞

徐夔妻袁氏 年二十三守節 現年六十一歲

徐上有妻陳氏 年廿八守節 七十五完貞

徐上朋妻喻氏 年廿七守節 七十八完貞

徐國瑞妻熊氏 年廿一守節 至八十完貞

劉承祖妻涂氏 年廿七守節 七十一完貞

羅允慧妻錢氏 年廿四守節 六十四完貞

晏一騰妻張氏 年二十守節 六十六完貞

晏士延妻余氏 年二十守節 六十五完貞

熊元煥妻余氏 年廿三守節 現六十七歲

余黃策妻汪氏 年廿八守節 現五十二歲

雷本朝妻熊氏 年廿三守節 五十九完貞

雷本初妻周氏 年廿六守節 現五十二歲

雷紹周妻黃氏 年廿二守節 現七十四歲

徐開校妻余氏 年廿五守節 現六十三歲

胡誤妻熊氏 年二十七守節 現七十七歲

湯必濂妻舒氏 年廿一守節 五十四完貞

王時雄妻李氏 年廿二守節 七十四完貞

王時銳妻鄒氏 年廿五守節 七十一完貞

雷良章妻熊氏 年廿四守節 現六十一歲

劉名上妻趙氏 年二十守節 六十九完貞

馬瑞達妻謝氏 年廿二守節 現年七十歲

舒克立繼妻熊氏 年廿八守節 四十七完貞

鍾增灝妻黃氏 年廿八守節 現五十六歲

陳聲遠妻蕭氏 年廿四守節 現五十二歲

涂苞坦妻舒氏 年廿三守節 現六十一歲

熊上顯妻陳氏 年廿五守節 至四十完貞

劉章模妻舒氏 年廿八守節 現五十八歲

張愈煇妻胡氏 年廿七守節 至七十完貞

邱仁良妻余氏 年廿七守節 現年七十歲

熊之林妻余氏 年廿七守節 六十二完貞

甘仁悌妻黎氏 年廿八守節 現年六十歲

劉孟相妻周氏 年廿六守節 現五十二歲

周今道妻陳氏 年三十守節 七十五完貞

舉人 項鵬妻吳氏 年廿八守節 四十八完貞

胡功嫻妻涂氏 年廿五守節 現五十八歲

丁光禮妻帥氏 年十八守節 現六十五歲

趙合濱妻余氏 年廿六守節 現七十五歲

周章錦妻陳氏 年廿五守節 現七十七歲

丁光祺妻舒氏 年廿七守節 現五十八歲

丁昭鳴妻趙氏 年廿四守節 至七十完貞

胡謨春妻潛氏 年廿一守節 至六十完貞

趙孚懋妻喻氏 年廿五守節 四十四完貞

涂承泰妻劉氏 年廿二守節 現六十五歲

劉光侑妻龔氏 年廿四守節 四十九完貞

舒而堯妻余氏 年廿七守節 至七十完貞

涂毓星妻余氏 年二十四守節 五十四完貞

熊求霖妻趙氏 年廿九守節 六十二完貞

熊之鏜妻劉氏 年三十守節 五十八完貞

熊之轆妻舒氏 年廿六守節 四十一完貞

孫方錦妻舒氏 年廿九守節 現六十九歲

陳采球妻鄧氏 年二十守節 現五十四歲

余昌求妻熊氏 年廿八守節 四十二完貞

程廷松妻徐氏 年廿二守節 現五十八歲

余國權妻李氏 年三十守節 七十一完貞

洪亮侯妻黃氏 年廿三守節 八十三完貞

舒宗鑑妻萬氏 年三十守節 現五十一歲

熊承泗妻余氏 年廿四守節 現八十一歲

熊求錦妻漆氏 年十八守節 五十一完貞

熊求錄妻陳氏 年廿七守節 現五十三歲

張克明妻胡氏 年廿九守節 八十九完貞

黃禮傳妻田氏 年廿九守節 現六十五歲

余聲遠妻李氏 年廿八守節 現五十二歲

舒瑞鏞妻漆氏 年三十守節 現六十二歲

涂紹泳妻晏氏 年廿四守節 五十一完貞

曾宗鴻妻蕭氏 年廿六守節 現六十二歲

湯必淞妾潛氏 年廿九守節 現七十六歲

錢熾昌妻宋氏 年三十守節 六十三完貞

錢鳳鳴妻舒氏 年廿五守節 五十三完貞

徐開壘妻舒氏 年廿二守節 至六十完貞

舒瑞鈞妻程氏 年廿九守節 現五十一歲

涂毓鳴妻陳氏 年廿四守節 現九十一歲

劉象鸚妻岳氏 年廿三守節 現五十八歲

陳時綸妻余氏 年廿六守節 五十八完貞

曾祖桃妻劉氏 年廿八守節 五十三完貞

涂協和妻熊氏 年廿五守節 現年九十歲

任爲菊妻甘氏 年二十守節 七十三完貞

涂毓建妻舒氏 年廿六守節 至七十完貞

舒采棟妻雷氏 年廿二守節 現五十三歲

涂光昭妻趙氏 年廿五守節 現五十五歲

葉和達妻羅氏 年廿六守節 現五十五歲

梁元達妻謝氏 年十七守節 七十二完貞

張鼎蕙妻鄒氏 年廿九守節 八十六完貞

余以湖妻胡氏 年廿四守節 現五十五歲

羅允文妻曾氏 年廿六守節 四十九完貞

余以洵妻涂氏 年廿八守節 現五十三歲

吳先智妻涂氏 年廿七守節 現五十四歲

胡承龍妻余氏 年廿五守節 現五十二歲

閔起遠妻舒氏 年廿九守節 現八十六歲

張克統妻余氏 年廿八守節 現年七十歲

徐洪傑妻舒氏 年十六守節 現七十五歲

閔京洪妻張氏 年廿八守節 現六十一歲

生員涂承照妻謝氏 年廿二守節 五十五完貞

涂紹甲妻晏氏 年十九守節 至四十完貞

舒瑞鎬妻應氏 年廿七守節 現七十一歲

涂承元妻蔡氏 年廿八守節 六十一完貞

徐步儒妻陳氏 年廿六守節 現五十六歲

張本鳳妻帥氏 年二十守節 六十三完貞

張愈宋妻徐氏 年三十守節 現六十四歲

洪采坊妻蔡氏 年廿六守節 七十四完貞

涂光前妻任氏 年廿三守節 現年八十歲

雷本昇妻舒氏 年廿八守節 現六十三歲

涂苞成妻舒氏 割股救夫年廿三 守節六十九完貞

胡祥義妻程氏 割股救夫年廿五 守節五十六歲

舒懋堃妻楊氏 年廿九守節 七十二完貞

劉義賢妻藍氏 年廿七守節 現五十九歲

吳毓元妻李氏 割股救夫年三十 守節五十六完貞

劉漢江妻陳氏 年三十守節 現六十四歲

舒采喬妻徐氏 年廿二守節 七十五完貞

沈子宣妻張氏 年廿八守節 現五十九歲

陳采煥妻余氏 年廿七守節 現五十三歲

陳榮國妻舒氏 年廿二守節 現六十三歲

彭良秀妻洪氏 年廿六守節 現年八十歲

余久漢妻涂氏 年二十一守節 現六十一歲

余廷宗妻張氏 年廿六守節 現年五十歲

曾維汪妻鍾氏 年廿三守節 現四十七歲

舒振楷妻漆氏 年廿一守節 四十一完貞

職員舒驥祥妻何氏 年十九守節 現五十六歲

余昌吉妻李氏 年廿七守節 現四十九歲

補遺

明

舒荀妻余氏

國朝

列女

賢淑

涂梁四妻趙氏夫病衣不解帶湯藥親嘗醫者言不治氏割

股和羹以進病頓蘇鄉人莫不賢之

舊志

廩貢生舒質妻陳氏夫病日夜侍湯藥不交睫者彌月病轉劇復割股和餌以進遂愈時未有知者久之婢言狀人咸

嗟異知縣馮渠贈以扁額鄒朝陽復爲立傳

增訂舊志

廩生涂彩銘妻錢氏幼嫻閨訓歸於涂得舅姑歡心姑病割股禱天願減己算壽姑已而姑果痊氏父母家貧無嗣請於族擇相當者繼其後又爲置產贍祭費鄰里有貧不能

娶者捐資助其昏凡修橋補路捨藥施棺一無所吝兩子皆有聲於庠人歸美於氏焉舊志

知縣涂基妻舒氏廩貢生青之長女幼偕兩弟讀書通大義父母極鍾愛之一夕課僕婦女紅婦舉鍼誤刺其目血流被面痛徹心骨父母急趨問乃詭自承一日遂眇婦感其德陰以泄於人曰姑如此存心他日福當無量也歸涂後事舅姑備極柔順基亦雅重其賢相敬如道儷交從夫宦遊嶺南克修內職子孫眾多相繼擢科名登仕宦累贈孺人新增

涂祚坡妻張氏年十九歸於祚坡未逾月而夫遠賈於外始

猶通音問後竟莫知所終氏封髮自守食貧事姑始終不渝其志現已五十四歲冰玉之操人無間言新增

彙載割股賢婦

黃簡文妻李氏療夫

應光武妻朱氏療夫

舒顯吉妻應氏療夫

以上舊志

涂桂先妻舒氏療母療夫二次

舒克懿妻錢氏療夫

舒壙妻周氏療夫

孫志淦妻鄭氏療姑

補賢婦

監生錢炳妻劉氏本襄陽舊家女炳客遊於楚聞其賢以禮

聘焉炳白手起家善於貨殖氏入門後佐治內事勤儉有
法費用益饒中歲夫歿訓其二子必名咏梅皆能恢宏父
業竝充上舍生相繼不祿痛撫四孫延師課讀已見新筍
一班氏老猶好勞日治絲枲以教諸婦自奉不許豐然於
合用者未嘗愆也道光五年夏邑大水河隄沖決燬議修
石壩氏體夫生前好義之志慨捐五百緡爲倡人皆以女
君子稱之